

नमो नमो निम्मलदंसणस्स
पूज्य आनंद-क्षमा-ललित-सुशील-सुधर्मसागर गुरुभ्यो नमः

On Line – आगममंजूषा

[३७] दसासुयकखंधो

* संकलन एवं प्रस्तुतकर्ता *
मुनि दीपरत्नसागर [M.Com., M.Ed., Ph.D.]

॥ किञ्चित् प्रास्ताविकम् ॥

ये आगम-मंजूषा का संपादन आजसे ७० वर्ष पूर्व अर्थात् वीर संवत् २४६८, विक्रम संवत्-१९९८, ई.स.1942 के दौरान हुआ था, जिनका संपादन पूज्य आगमोद्धारक आचार्यश्री [आनंदसागरसूरिजी](#) म.सा.ने किया था। आज तक उन्ही के प्रस्थापित-मार्ग की रोशनी में सब अपनी-अपनी दिशाएँ ढूँढते आगे बढ़ रहे हैं।

हम ७० साल के बाद आज ई.स.-2012, विक्रम संवत्-२०६८, वीर संवत्-२५३८ में वो ही आगम-मंजूषा को कुछ उपयोगी परिवर्तनों के साथ इंटरनेट के माध्यम से सर्वथा सर्वप्रथम “**OnLine-आगममंजूषा**” नाम से प्रस्तुत कर रहे हैं।

* मूल आगम-मंजूषा के संपादन की किञ्चित् भिन्नता का स्वीकार *

- [१] आवश्यक सूत्र-(आगम-४०) में केवल मूल सूत्र नहीं है, मूल सूत्रों के साथ निर्युक्ति भी सामिल की गई है।
[२] जीतकल्प सूत्र-(आगम-३८) में भी केवल मूल सूत्र नहीं है, मूलसूत्रों के साथ भाष्य भी सामिल किया है।
[३] जीतकल्प सूत्र-(आगम-३८) का वैकल्पिक सूत्र जो “पंचकल्प” है, उनके भाष्य को यहाँ सामिल किया गया है।

[४] “ओघनिर्युक्ति”-(आगम-४१) के वैकल्पिक आगम “पिंडनिर्युक्ति” को यहाँ समाविष्ट तो किया है, लेकिन उनका मुद्रण-स्थान बदल गया है।

[५] “कल्प(बारसा)सूत्र” को भी मूल आगममंजूषा में सामिल किया गया है।

-मुनि दीपरत्नसागर

: Address:-

Mnui Deepratnasagar,
MangalDeep society, Opp.DholeswarMandir,
POST:- THANGADH Dist.surendranagar.
Mobile:-9825967397 jainmunideepratnasagar@gmail.com

मुनि दीपरत्नसागर



नमो अरिहंताणं नमो सिद्धाणं नमो आयरियाणं नमो उवज्झायाणं नमो लोए सव्वसाहूणं (११। प्र०) 'एसो पंचनमुक्कारो, सव्वपावप्पणासणो । मंगलाणं च सव्वेसिं, पढमं हवइ मंगलं (प्र०॥ १ ॥) सुयं मे आउसंतेणं भगवया एवमक्खायं-१। इह खलु थेरेहिं भगवंतेहिं वीसं असमाहिठाणा पन्नत्ता, कयरे खलु ते थेरेहिं भगवंतेहिं वीसं असमाहिठाणा पं०?, इमे खलु ते थेरेहिं भगवंतेहिं वीसं असमाहिठाणा पं० तं०-दवदवचारी यावि भवति, अप्पमज्जियचारी यावि०, दुप्पमज्जियचारी यावि०, अतिरिन्नेजासणिए, रायणियपरिभासी, थेरोवघाइए, भूतोवघातिए, संजलणे, कोहणे, पिठ्ठिमंसिए यावि० १० अभिक्खणं अभिक्खणं ओधारित्ता, णवाइं अधिकरणाइं अणुप्पणाइं उप्पाइया यावि०, पुराणाइं अधिकरणाइं खामितविउसविताइं उदीरित्ता, अकाले सज्झायकारी यावि०, ससरक्खपाणिपादे, सहकरे, झंझकरे, कलहकरे, सूरप्पमाणभोई, एसणाइ अस-मिए यावि भवति २०, एते थेरेहिं भगवंतेहिं वीसं असमाहिठ्ठाणा पन्नत्तत्ति बेमि । २ ॥ असमाधिस्थानाध्ययनं १ ॥ सुयं मे आउसंतेणं भगवया एवमक्खायं-इह खलु थेरेहिं भगवंतेहिं एक्कवीसं सबला पं०, कयरे खलु०?, इमे खलु० तं०-हत्थकम्मं करेमाणे सबले, मेहुणं पडिसेवेमाणे, राइभोयणं भुंजमाणे, आहाकम्मं भुंजमाणे, रायपिंडं भुंजमाणे, उद्देसियं कीयं पामिच्चं अच्छिज्जं अणिसिट्ठं आहट्टु दिज्जमाणं भुंजमाणे, अभिक्खणं २ पडियाइक्खित्ता भुंजमाणे, अंतो मासस्स तओ दगलेवे करेमाणे, अंतो छण्हं मासाणं गणाओ गणं संकममाणे, अंतो मासस्स तओ माइठाणे करेमाणे १० सागारियं पिंडं भुंजमाणे, आउट्टियाए पाणाइवायं करेमाणे, आउट्टियाए मुसावायं करेमाणे, आउट्टियाए अदिण्णादाणं गिण्हमाणे, आउट्टियाए अणंतरहियाए पुढवीए ठाणं वा सेज्जं वा निसीहियं वा चेतमाणे, एवं ससिणिद्धाए पुढवीए एवं ससरक्खाए, आउट्टियाए चित्तमंताए सिलाए चित्तमंताए लेलुए कोलावासंसि वा दारुए जीवपंड्ठिए सअंडे सपाणे सवीए सहरिए सउस्से सउत्तिंगपणगदगमट्टियमक्कडसंताणए तहप्पगारं ठाणं वा सिज्जं वा निसीहियं वा चेतमाणे, आउट्टियाए मूलभोयणं वा कंदभोयणं वा (खंध०) तया० वा पवालभोयणं वा पुष्पभोयणं वा फलभोयणं वा बीयभोयणं वा हरियभोयणं वा भुंजमाणे, अंतो संवच्छरस्स दस दगलेवे करेमाणे, अंतो संवच्छरस्स दस माइ-ठाणाइं करेमाणे, आउट्टियाए सीतोदगरयउग्घाइएण हत्थेण वा मत्तेण वा दवीए वा भायणेण वा असणं वा० पडिगाहेत्ता भुंजमाणे २१; एते खलु थेरेहिं भगवंतेहिं एक्कवीसं सबला पन्नत्तत्ति बेमि । ३ ॥ शबलाध्ययनं २ ॥ सुयं मे आउसंतेणं भगवया एवमक्खायं-इह खलु थेरेहिं भगवंतेहिं तेत्तीसं आसायणाओ पं०, कयरा खलु थेरेहिं०?, इमाओ खलु ताओ थेरेहिं भगवंतेहिं तेत्तीसं आसायणाओ पं० तं०-सेहे रायणियस्स पुरओ गंता भवति आसायणा सेहस्स, सेहे रायणियस्स सपक्खं (पक्खओ) गंता भवति आसायणा सेहस्स, सेहे रायणियस्स आसणं गंता भवति आसायणा सेहस्स, एवं एएणं अभिलावेणं, सेहे राइणियस्स पुरओ चिट्ठित्ता भवति आसायणा सेहस्स, सेहे राइणियस्स सपक्खं चिट्ठित्ता भवति आसायणा सेहस्स, सेहे रायणियस्स आसणं चिट्ठित्ता भवति आसायणा सेहस्स, सेहे राइणियस्स पुरओ निसीइत्ता भवति आसायणा सेहस्स, सेहे रायणियस्स सपक्खं निसीइत्ता भवति आसायणा सेहस्स, सेहे राइणियस्स आसणं निसीइत्ता भवति आसायणा सेहस्स, सेहे राइणिएण सद्धिं बहिया वियारभूमिं निक्खंते समाणे तत्थ पुब्बामेव सेहतराए आयामति पच्छा रायणिए आसायणा सेहस्स १० सेहे राइणिएणं सद्धिं बहिया विहारभूमिं वा वियारभूमिं वा निक्खंते समाणे तत्थ पुब्बामेव सेहतराए आलोएति पच्छा राइणिए आसायणा सेहस्स, केइ राइणियस्स पुब्ब-संलत्तए सिया तं पुब्बामेव सेहतराए आलवइ पच्छा राइणिए आसायणा सेहस्स, सेहे रायणियस्स राओ वा वियाले वा वाहरमाणस्स अज्जो! के सुत्ते? के जागरे? तत्थ सेहे जागर-माणे राइणियस्स अप्पडिसुणित्ता भवति आसायणा सेहस्स, सेहे असणं वा० पडिग्गाहिज्जा तं पुब्बामेव सेहतरागस्स आलोएति पच्छा राइणियस्स आसायणा सेहस्स, सेहे असणं वा० पडिग्गाहित्ता पुब्बामेव सेहतरागं पडिदंसेति० आसायणा सेहस्स, सेहे असणं वा० पडिग्गाहित्ता पुब्बामेव सेहतरागं उवणिमंतेति पच्छा राइणिए आसायणा सेहस्स, सेहे राइणिएणं सद्धिं असणं वा० आहारेमाणे तत्थ सेहे खद्धं २ डार्यं २ रसियं २ ऊसठं २ मणुण्णं २ मणामं २ निद्धं २ लुक्खं २ आहारित्ता भवति आसायणा सेहस्स, सेहे राइणियस्स वाहरमाणस्स अपडिसुणित्ता भवति आसायणा सेहस्स, सेहे राइणि-यस्स वाहरमाणस्स तत्थगते चेव पडिसुणित्ता भवति आसायणा सेहस्स २० सेहे राइणियं किति वत्ता भवति आसायणा सेहस्स, सेहे राइणियं तुमंति वत्ता भवति आसायणा (२४५)

सेहस्स, सेहे राइणियं खद्धं २ वत्ता भवति आसायणा सेहस्स, सेहे राइणियं तज्जाएणं तज्जायं पडिभणित्ता भवति आसायणा सेहस्स, सेहे राइणियस्स कहं कहेमाणस्स इति एवं वत्ता भवति आसायणा सेहस्स, सेहे राइणियस्स कहं कहेमाणस्स णो सुमरसित्ति वत्ता भवति आसातणा सेहस्स, सेहे राइणियस्स कहं कहेमाणस्स नो सुमणा भवति आसायणा सेहस्स, सेहे राइणियस्स कहं कहेमाणस्स परिसं भेत्ता भवति आसायणा सेहस्स, सेहे राइणियस्स कहं कहेमाणस्स कहं आच्छिंदित्ता भवति आसादणा सेहस्स, सेहे राइणियस्स कहं कहेमाणस्स तीसे परिसाए अणुट्टिताए अभिन्नाए अब्बोच्छिन्नाए अब्बोगडाए दुच्चंपि तमेव कहं कहेत्ता भवति आसादणा सेहस्स ३० सेहे राइणियस्स सेज्जासंथारणं पाएणं संघट्टित्ता हत्थेणं अणणुणवेत्ता गच्छति आसातणा सेहस्स, सेहे राइणियस्स सेज्जासंथारए चिट्टित्ता वा निसीइत्ता वा तुयट्टित्ता वा भवति आसादणा सेहस्स, सेहे राइणियस्स उच्चासणंसि वा समासणंसि वा चिट्टित्ता वा निसीइत्ता वा तुयट्टित्ता वा भवति आसादणा सेहस्स, एताओ खलु ताओ थेरेहिं भगवंतेहिं तेत्तीसं आसायणाओ पणत्ताओत्ति वेमि ।४॥ आशातनाध्ययनं ३ ॥ सुयं मे आउसंतेणं भगवया एवमक्खायं-इह खलु थेरेहिं भगवंतेहिं अट्टविहा गणिसंपदा पं०, कयरा खलु थेरेहिं भगवंतेहिं अट्टविहा गणिसंपदा पं० ?, इमा खलु थेरेहिं भगवंतेहिं अट्टविहा गणिसंपदा पं० तं०-आयारसंपया सुय० सरीस० वयण० वायणा० मति० पजोग० संगहपरिणा णाम अट्टमा ।५। से किं तं आयारसंपया ?, २ चउव्विहा पं० तं०-संजमधुवजोगजुत्ते यावि भवति असंपगहिज्जाए अणियता वित्ती बुद्धसीले यावि भवति, से तं आयारसंपदा ।६। से किं तं सुयसंपदा ?, २ चउव्विहा पं०, तं०-बहुसुत्ते यावि भवति विचित्तसुत्ते० परिचित्तसुत्ते घोसविसुद्धि-कारए०, से तं सुयसंपदा ।७। से किं तं सरीसंपदा ?, २ चउव्विहा पं० तं०-आरोहपरिणाहसंपन्ने यावि भवति अणोत्तप्पसरीरे थिरसंघयणे बहुपडिपुण्णेदिए यावि भवति, से तं सरीसंपदा ।८। से किं तं वयणसंपदा ?, २ चउव्विहा पं० तं०-आदिज्जवयणे यावि भवति महुरवयणे० अणिसियवयणे फुडवयणे, सेत्तं वयणसंपदा ।९। से किं तं वायणासंपदा ?, २ चउव्विहा पं० तं०-विजयं उद्दिसति विजयं वाएति परिनिव्वावियं वाएति अत्थणिज्जवए यावि भवति, से तं वायणासंपदा ।१०। से किं तं मतिसंपदा ?, २ चउव्विहा पं० तं०-उग्गहमतिसंपदा ईहा० अवाय० धारणा०, से किं तं उग्गहमइ०?, २ छव्विहा पं० तं०-खिप्पं ओगिण्हति बहुं० बहुविहं० धुवं० अणिसियं० असंदिद्धं०, से तं उग्गहमती, एवं ईहामतीवि, एवं अवाय-मतीवि, से किं तं धारणामती ?, २ छव्विहा पं० तं०-बहुं धरति बहुविधं० पुराणं० दुद्धरं० अणिसियं० असंदिद्धं धरेति, से तं धारणामती, से तं मतिसंपदा ।११। से किं तं पओगसंपदा ?, २ चउव्विहा पं० तं०-आयं विदाय वादं पउंजित्ता भवति परिसं विदाय वादं पउंजित्ता० खेत्तं विदाय वादं वत्थुं०, से तं पओगमतिसंपदा ।१२। से किं तं संगहपरिणासंपदा ?, २ चउव्विहा पं० तं०-बहुजणपाउग्गत्ताए वासावासासु खित्तं पडिलेहित्ता भवति बहुजणपाओगत्ताए पाडिहारियं सेज्जासंथारयं ओगिण्हित्ता भवति कालेणं कालं समाणइत्ता भवति आहागुरु संपूइत्ता भवति, से तं संगहपरिणा ।१३। आयरियत्तो अंतेवासी इमाए चउव्विहाए विणयपडिवत्तीए विणइत्ता णिरिणत्तं गच्छति, तं०-आयारविणएणं सुयविणएणं विक्खेवणाविणएणं दोसनिग्घायणाविणएणं, से किं तं आयारविणए ?, २ चउव्विहे पं० तं०-संजमसामायारी यावि भवति तवसामायारी० गणसामायारी० एगल्लविहारसामायारी०, से तं आयारविणए, से किं तं सुयविणए ?, २ चउव्विहे पं० तं०-सुयं वाएति अत्थं० हियं० निस्सेसं०, से तं सुयविणए, से किं तं विक्खेवणाविणए ?, २ चउव्विहे पं० तं०-अदिट्ठं वाएति दिट्ठपुव्वगत्ताए विणएत्ता भवति, दिट्ठपुव्वगं साहम्मियत्ताए०, दिट्ठपुव्वगं सहेतुतं धम्माओ धम्मे ठावित्ता भवति, तस्सेव धम्मस्स हियाए सुहाए खमाए निस्सेयसाए आणुगाभियत्ताए अब्भुट्टेत्ता भवति, से तं विक्खेवणाविणए, से किं तं दोसनिग्घायणाविणए ?, २ चउव्विहे पं० तं०-कुद्धस्स कोहं विणइत्ता भवति, दुट्ठस्स दोसं णिगिण्हित्ता भवति, कंखियस्स कंखं छिंदित्ता भवति, आया सुप्पणिधितो यावि भवति, से तं दोसनिग्घायणाविणए ।१४। तस्सेवंगुणजातीयस्स अंतेवासिस्स इमा चउव्विहा विणयपडिवत्ती भवति तं०-उवगरणउप्पायणता साहिल्लता वण्णसंजलणता भारपच्चोरुहणता, से किं तं उवगरणउप्पायणया ?, २ चउव्विहा पं० तं०-अणुप्पन्नाइं उवगरणाइं उप्पाएत्ता भवति, पोरणाइं उवगरणाइं सारक्खित्ता भवति, संगोवित्ता परित्तं जाणित्ता पच्चुद्धरित्ता भवति, आहाविहिं विसंभइत्ता भवति, सेत्तं उवगरणउप्पायणया, से किं तं साहिल्लया ?, २ चउव्विहा पं० तं०-अणुलोमवइसहिते यावि भवति अणुलोमकायकिरियत्ता० पडिरूवकायसंफासणया० सब्बत्थेसु अप्पडिलोमया०, से तं साहिल्लया, से किं तं वण्णसंजलणया ?, २ चउव्विहा पं० तं०-आहातच्चारणं वण्णवाइं भवति, अव-ण्णवाइं पडिहणित्ता, वण्णवाइं अणुबूहित्ता, आयवुड्ढासेवी यावि०, से तं वण्णसंजलणया, से किं तं भारपच्चोरुहणता ?, २ चउव्विहा पं० तं०-असंगहियपरिजणं संगिण्हित्ता भवति, सेहं आयारगोयरं गाहित्ता भवति, साहम्मियस्स गिलायमाणस्स आहाथामं वेयावच्चे अब्भुट्टित्ता भवति, साहम्मियाणं अधिकरणंसि उप्पणंसि तत्थ अणिसित्तोवस्सित्तो वसंतो अप-क्खगाहए मज्झत्थभावभूते सम्मं ववहरमाणे तस्स अधिकरणस्स खामणविउसमणयाए सया समियं अब्भुट्टित्ता भवति कहं (नु) साहम्मिया अप्पसहा अप्पझंझा अप्पकलहा

१८१ दशाश्रुतस्कंधच्छेदसूत्रं, ६२१-४

मुनि दीपरत्नसागर

अप्पकसाया अप्पतुमंतुमा संयमबहुला संवरबहुला समाहिबहुला अप्पमत्ता संजमेणं तवसा अप्पाणं भावेमाणा एवं च णं विहरेज्जा, से तं भारपच्चोरुहणता, एसा खलु थेरेहिं भगवंतेहिं अट्टविहा गणिसंपदा पणत्तत्ति बेमि । १५ ॥ गणिसंपदध्ययनं ४ ॥ सुयं मे आउसंतेणं भगवया एवमक्खायं-इह खलु थेरेहिं भगवंतेहिं दस चित्तसमाहिठणा पं०, कयरे खलु ते थेरेहिं०१, इमे खलु ते० दस चित्तसमाहिठणा पं० तं०-तेणं कालेणं० वाणियगामं नामं नयरे होत्था एत्थ णं नगरवण्णओ भाणियव्वो, तस्स णं वाणियगामनगरस्स बहिया उत्तरपुरच्छिमे दिसिभाए दूइपलासे नामं चेइए होत्था चेइयवण्णओ भाणियव्वो, जियसत्तू राया, तस्स धारिणी देवी, एवं सव्वं समोसरणं भाणियव्वं जाव पुढवीसिलापट्टए, सामी समोसटे, परिसा निग्गया, धम्मो कहिओ, परिसा पडिगया । १६ । अज्जोत्ति समणे भगवं महावीरे समणे निग्गंथे निग्गंथीओ य आमंतित्ता एवं वयासी-इह खलु अज्जो ! निग्गंथाण वा निग्गंथीण वा ईरियास-मियाणं भासासमियाणं एसणासमियाणं आयाणभंडमत्तनिकखेवणासमियाणं उच्चारपासवणखेलजल्लुसिंघाणपारिट्टावणियासमियाणं मणस० वयणस० काय० मणगुत्ताणं वयगुत्ताणं कायगुत्ताणं गुत्तिंदियाणं गुत्तबंभयारीणं आयट्टीणं आयहियाणं आयजोईणं आयपरक्कमाणं पक्खियपोसहीए सुसमाहीपत्ताणं झियायमाणानं इमाइं दस चित्तसमाहिठणाइं असमु-प्पण्णपुट्टाइं समुप्पज्जिजा, तं०-धम्मचिंता वा से असमुप्पण्णपुट्टा समुप्पजेज्जा सव्वं धम्मं जाणेत्तए, सण्णिणाणे वा से असमुप्पण्णपुट्टे समुप्पजेज्जा अहं सरामित्ति अप्पणो पोरानियं जाइं सुमरित्तए, सुमिणदंसणे वा से असमुप्पण्णपुट्टे समुप्पजेज्जा आहातच्चं सुमिणं पासित्तए, देवदंसणे वा से असमुप्पण्णपुट्टे समुप्पजेज्जा दिव्वं देविडिंढ दिव्वं देवजुइं दिव्वं देवाणुभावं पासित्तए, ओहिनाणे वा से असमुप्पण्णपुट्टे समुप्पज्जिजा ओहिणा लोयं जाणित्तए, ओहिदंसणे वा से असमुप्पण्णपुट्टे समुप्पजेज्जा ओहिणा लोयं पासित्तए, मणपज्जवनाणे वा से असमुप्पण्णपुट्टे समुप्पजेज्जा अंतो मणुस्सखेत्तेसु अड्ढाइज्जेसु दीवसमुहेसु सन्नीणं पंचिंदियाणं पज्जत्ताणं मणोगए भावे जाणेत्तए, केवलनाणे वा से असमुप्पण्णपुट्टे समुप्पजेज्जा केवलकप्पं लोयालोयं जाणेत्तए, केवलदंसणे वा से असमुप्पण्णपुट्टे समुप्पजेज्जा केवलकप्पं लोयालोयं पासित्तए, केवलमरणे वा से असमुप्पण्णपुट्टे समुप्पजेज्जा सव्वदुक्खप्पहीणाए । १७ । 'ओयं चित्तं समादाय, ज्ञाणं समणुपासति । धम्मं ठिओ अविमणो, निव्वानमभिगच्छति ॥ १ ॥ ण इमं चित्तं समादाय, भुज्जो लोयंसि जायति । अप्पणो उत्तमं ठाणं, सण्णी-णाणेण जाणति ॥ २ ॥ अहातच्चं तु सुविणं, खिप्पं पासति संवुडे । सव्वं वा ओहं तरति, दुक्खादा य विमुच्चति ॥ ३ ॥ पंताइं भयमाणस्स, विचित्तं सयणासणं । अप्पाहारस्स दंतस्स, देवा दंसेति ताइणो ॥ ४ ॥ सव्वकामविरत्तस्स, खमतो भयभेरवं । तओ से ओही भवति, संजयस्स तवस्सिणो ॥ ५ ॥ तवसाऽवहडलेसस्स, दंसणं परिसुज्झति । उड्ढं अहे य तिरियं च, सव्वं समणुपस्सति ॥ ६ ॥ सुसमाहडलेस्सस्स, अवितक्कस्स भिक्खुणो । सव्वओ विप्पमुक्कस्स, आया जाणति पज्जवे ॥ ७ ॥ जया से नाणावरणं, सव्वं होति खयं गयं । तया लोगमलोगं च, जिणो जाणति केवली ॥ ८ ॥ जया से दंसणावरणं, सव्वं होति खयं गयं । तओ लोगमलोगं च, जिणो पासइ केवली ॥ ९ ॥ पडिमाए विसुद्धाए, मोहणिज्जे खयं गए । असेसं लोग-मलोगं च, पासति सुसमाहिए ॥ १० ॥ जहा य मत्थयसूई, हयाए हम्मते तले । एवं कम्माणि हम्मंति, मोहणिज्जे खयं गए ॥ ११ ॥ सेणावतिंमि णिहते, जहा सेणा पणस्सति । एवं कम्मा पणस्संति, मोहणिज्जे खयं गए ॥ १२ ॥ धूमहीणो जहा अग्गी, खिज्जते से निरिंधणे । एवं कम्माणि खीयंते, मोहणिज्जे खयं गए ॥ १३ ॥ सुक्कमूले जहा रुक्खे, सिच्चमाणे ण रोहति । एवं कम्मा ण रोहंति, मोहणिज्जे खयं गए ॥ १४ ॥ जहा दड्ढाण बीयाणं, ण जायंति पुणंकुरा । कम्मबीए तहा दड्ढे (प्र० सु दड्ढेसु), न रोहंति भवंकुरा ॥ १५ ॥ चिच्चा ओरालियं बोंदिं, नामगोत्तं च केवली । आउयं वेयणिज्जं च, छित्ता भवति नीरए ॥ १६ ॥ एवं अभिसमागम्म, चित्तमादाय आउसो ! । सेणिसोधिमुवागम्म, आया सोहीमुवागए ॥ १७ ॥ -त्ति बेमि ॥ चित्तसमाधिस्थानाध्ययनं ५ ॥ सुयं मे आउसंतेणं भगवया एवमक्खायं-इह खलु थेरेहिं भगवंतेहिं इक्कारस उवासगपडिमाओ पं०, कयराओ खलु ताओ थेरेहिं भगवंतेहिं इक्कारस उवासगपडिमाओ पं० ?, इमा खलु ताओ थेरेहिं भगवंतेहिं इक्कारस उवासगपडिमाओ पं० तं०-अकिरियावादी यावि भवति नाहियवाई नाहियपण्णे नाहियदिट्ठी नो सम्मा-वादी नो णितियावादी नोसंतिपरलोगवादी णत्थि इहलोए णत्थि परलोए णत्थि माया णत्थि पिया णत्थि अरिहंता नत्थि चक्कवट्ठी णत्थि बलदेवा णत्थि वासुदेवा णत्थि नरया णत्थि नेरइया णत्थि सुक्कडदुक्कडाणं फलवित्तिविसेसे णो सुचिण्णा कम्मा सुचिण्णफला भवंति णो दुच्चिण्णा कम्मा दुच्चिण्णफला भवंति अफले कल्लाणपावए नो पच्चायंति जीवा णत्थि निरया णत्थि सिद्धी, से एवंवादी से एवंपण्णे एवंदिट्ठी एवंछंदरागभिणिविट्ठे आवि भवति, से य भवति महिच्छे महारंभे महापरिग्गहे अहम्मिए अहम्माणुए अहम्मसेवी अह-म्मिट्ठे अधम्मक्खाई अधम्मपलोई अधम्मजीवी अधम्मपलज्जणे अधम्मसीलसमुदायारे अधम्मणेणं चैव वित्तिं कप्पेमाणे विहरइ, हण छिंदं भिंदं विकत्तए अंतके लोहितपाणी चंडा रुहा खुहा साहस्सिया उक्कंचणमायाणियडिकूडकवडसातिसंपओगबहुला दुस्सीला दुप्परिचया दुरणुणेया दुव्वया दुप्पडियाणंदा निस्सीला निग्गुणा णिम्मैरा निप्पच्चक्खाणपोसहोववासी

असाहू सबाओ पाणाइवायाओ अप्पडिविरया जावजीवाए एवं जाव सबाओ कोहाओ सबाओ माणाओ सबाओ मायाओ सबाओ लोभाओ सबाओ पेजाओ दोसाओ कलहाओ अम्भक्खाणाओ पेसुन्नाओ परपरिवादाओ अरतिरतीओ सबाओ मायामोसाओ मिच्छादंसणसल्लाओ अप्पडिविरया जावजीवाए सबाओ कसायदंड(त)कट्टण्हाणुवट्टणम्भंगणवण्णयम-इणविलेवणसइफरिसरसरूवगंधमल्लालंकाराओ अप्पडिविरया जावजीवाए सबाओ सगडरहजाणजुग्गिह्थिह्थिसीयासंदमाणियासयणासणयाणवाहणभोयणपवित्थरविधीतो अप्प-डिविरया जावजीवाए असमिक्खियकारी सबाओ आसहत्थिगोमहिसगवेलयदासीदासकम्मकरपुरिसाओ अप्पडिविरया जावजीवाए सबाओ कयविक्रयमासदमासरूवगसंववहाराओ अप्पडिविरया जावजीवाए सबाओ हिरण्णसुवण्णधणधणमणिमुत्तियसंखसिलप्पवालाओ अप्पडिविरया जावजीवाए सबाओ कूडतुलकूडमाणो अप्पडिविरया सबाओ आरंभसमा-रंभाओ अप्पडिविरया सबाओ पयणपयावणाओ अप्पडिविरया सबाओ करणकारावणाओ अप्पडिविरया सबाओ कुट्टणपिट्टणतज्जणताडणवधबंधपरिकिलेसाओ अप्पडिविरया जाव-जीवाए जे यावण्णे तहप्पगारा साक्खा अबोहिया कम्मंता परपाणपरियावणकडा कज्जंति ततोवि अप्पडिविरया जावजीवाए से जहानामए केइ पुरिसे कलमसूरतिलमुग्गमासनिप्फाव-कुलत्थअलिसंदगजवएवमादीहिं अयते कूरे मिच्छादंडं पउंजइ एवामेव तहप्पगारे पुरिसजाए तिच्चिरवट्टगलावगकपोतकपिंजलभिगमहिसवराहगोगोहकुम्मसरीसिवाइएहिं अयते कूरे मिच्छादंडं पउंजति, जाऽविय से बाहिरिया परिसा भवति तं०-दासेति वा पेसेति वा भतएति वा भाइल्लेति वा कम्मकरएति वा भोगपुरिसेति वा तेसिंपिय णं अण्णयरगंसि अहालघुसयंसि अवराहंसि सयमेव गरुयं दंडं निवत्तेति तं०-इमं दंडेह इमं मुंडेह इमं तजेह इमं तालेह इमं दुब्बंधणं करेह इमं नियलबंधणं इमं हडिबंधणं इमं चारगबंधणं इमं नियलजुयलसंकु-डियमोडितयं इमं हत्थच्छिन्नयं इमं पादच्छिन्नयं इमं कण्णच्छिन्नं इमं नक्कच्छिन्नं इमं ओट्टच्छिण्णं इमं सीसच्छिन्नं इमं मुखच्छिण्णयं इमं वड्यच्छीइयं इमं हियउप्पाडियं एवं नयण-दसणवयण० इमं जिम्भुप्पाडियं करेह इमं ओलंबिययं इमं घंसिययं इमं घोलितयं इमं सूलाइयं इमं सूलाभिण्णं इमं खारवत्तियं इमं दम्भवत्तियं इमं सीहपुच्छियं इमं वसभपुच्छियं इमं कड(दव)ग्गिदड्ढयं इमं काकणिमंसखातियं इमं भत्तपाणनिरुद्धयं करेह इमं जावजीवबंधणं करेह इमं अन्नतरेणं असुभेणं कुमारेणं मारेह, जाऽविय से अम्भितरिया परिसा भवति तं०-माताति वा पिताति वा भायाइ वा भइणीति वा भज्जाति वा धूयाति वा सुण्हाति वा तेसिंपिय णं अण्णयरंसि अहालहुसगंसि अवराहंसि सयमेव गरुयं दंडं निवत्तेति तं०-सीतोदग-वियडंसि कायं बोलित्ता भवति उसिणोदगवियडेण कायं ओसिंचित्ता भवति अगणिकाएण कायं उवडहिया भवति जोत्तेण वा वेत्तेण वा नेत्तेण वा कसेण वा छिवाडीए वा लताए वा पासाइं उद्दालेत्ता भवति दंडेण वा अट्टीण वा मुट्टीण वा लेलुणा वा कवालेण वा कायं आउट्टित्ता भवति, तहप्पगारे पुरिसजाए संवसमाणे दुम्मणे भवति, तहप्पगारे पुरिसजाते विप्पव-समाणे सुमणा भवति, तहप्पगारे दंडपासी (रुई) दंडगुरुए दंडपुरक्खडे अहिए अस्सि लोयंसि अहिए परंसि लोगंसि ते दुक्खति सोयति एवं जूरति तिप्पति पिट्टति परितप्पति, ते दुक्ख-णसोयणजूरणतिप्पणपिट्टणपरितप्पणवधबंधपरिकिलेसाओ अप्पडिविरया भवति, एवमेव ते इत्थिकामेहिं मुच्छिया गढिया गिद्धा अज्झोववण्णा जाव वासाइं चउपंचमाइं छइसमाणि वा अप्पतरं वा भुज्जतरं वा कालं भुंजित्ता भोगभोगाइं पसवित्ता वेरायतणाइं संचिणित्ता बहुयाइं पावाइं कम्माइं ओसण्णं संभारकडेण कम्मणा से जहानामए अयगोलेति वा सेलगोलेति वा उदयंसि पक्खित्ते समाणे उदगतलमइवइत्ता अहेधरणितलपतिट्टाणे भवति एवामेव तहप्पगारे पुरिसजाए वज्जबहुले धुण्ण० पंक० वेर० दंभ० नियडि० आसायण० (असाय०) अयस० अप्पत्तिय० ओसण्णं तसपाणघाती कालमासे कालं किच्चा धरणितलमतिवत्तित्ता अहेनरगतलपतिट्टाणे भवति, ते णं नरगा अंतो वट्टा बाहिं चउरंसा अहे खुरप्पसंठाणसंठिया निच्चंधगारतमसा ववगयगहचंदसूरनक्खत्तजोइसप्पहा मेदवसामंसरुहिरपूयपडलचिक्खल्लित्ताणुलेवणतला असुई वीसा परमदुब्भिमगंधा काउयअगणिवन्नाभा कक्खडफासा दुरहि-यासा नरगा असुभा नरगा असुभा नरगेषु वेदणा नो चेव णं नरएसु नेरइया निदायंति वा पयलायंति वा सुतिं वा रतिं वा धितिं वा मतिं वा उवलमंति, ते णं तत्थ उज्जलं विउलं पगाढं कक्कसं कडुयं रोहं दुक्खं चंडं तिच्चं तिक्खं तिच्चं दुरहियासं नरएसु नेरइया नरयवेयणं पच्चणुभवमाणा विहरंति, से जहानामए रुक्खे सिया पच्चतग्गे जाए मूलच्छिन्ने अग्गेगरुए जतो निच्चं जतो दुग्गं जतो विसमं ततो पवडति एवामेव तहप्पगारे पुरिसजाए गम्भाओ गम्भं जम्माओ जम्मं मरणाओ मरणं दुक्खाओ दुक्खं दाहिणगाभिए नेरइए कण्हपक्खिए आगमिस्साणं दुल्लभबोधिते यावि भवति, से तं अकिरियावादी । १८। से किं तं किरियावादी?, २ भवति तं०-आहियवादी आहियपण्णे आहियदिट्टी सम्मावाइं नियावाइं संतिपरलो-यवादी अत्थि इहलोए अत्थि परलोए अत्थि पिया अत्थि माता अत्थि अरिहंता अत्थि चक्खवट्टी अत्थि बलदेवा अत्थि वासुदेवा अत्थि सुकडदुक्कडाणं कम्माणं फलवित्तिविसेसे सुचिन्ना कम्मा सुचिन्नफला भवति दुच्चिण्णा कम्मा दुच्चिण्णफला भवति सफले कल्लाणपावए पच्चायंति जीवा अत्थि नेरइया अत्थि देवा अत्थि सिद्धी, से एवंवादी एवंपच्चे एवंदिट्टी एवं छंदरा-

१८३ दशाश्रुतस्कंधच्छेदसूत्रं, ५२१-६

मुनि दीपरत्रसागर

गभिनिविट्टे आवि भवति, से भवति महिच्छे जाव उत्तरगामिए नेरइए सुक्कपक्खिए आगमेसाणं सुलभबोहिए यावि भवति, से तं किरियवादी । १९ । सबधम्मरुई यावि भवति, तस्स णं बहूइं सीलवयगुणवयवेरमणपच्चक्खाणपोसहोववसाइं नो सम्मं पट्टवितपुट्ठाइं भवंति, एवं दंसणसावओ पढमा उवासगपडिमा । २० । अहावरा दोच्चा उवासगपडिमा-सबधम्मरुई यावि भवति, तस्स णं बहूइं सीलवयगुणवयवेरमणपच्चक्खाणपोसहोववसाइं सम्मं पट्टविताइं भवंति, से णं सामाइयदेसावगासियं नो सम्मं अणुपालित्ता भवति, दोच्चा उवासगपडिमा । २१ । अहावरा तच्चा उवासगपडिमा सबधम्मरुई यावि भवति, तस्स णं बहूइं सीलवयगुणवयवेरमणपच्चक्खाणपोसहोववसाइं सम्मं पट्टविताइं भवंति, से णं सामाइयदेसावगासियं सम्मं अणुपालित्ता भवति, से णं चाउदसअट्टमीउद्विट्ठपुण्णमासिणीसु पडिपुण्णं पोसहं नो सम्मं अणुपालेत्ता भवति, तच्चा उवासगपडिमा । २२ । अहावरा चउत्था उवासगपडिमा-सबधम्मरुई यावि भवति, तस्स णं बहूइं सीलवय जाव सम्मं पट्टविताइं भवंति, से णं सामाइयदेसावगासियं सम्मं अणुपालेत्ता भवइ, से णं चाउदसअट्टमिउद्विट्ठपुण्णमासिणीसु पडिपुण्णं पोसहं सम्मं अणुपालेत्ता भवति, से णं एगराइयं उवासगपडिमं नो सम्मं अणुपालेत्ता भवति, चउत्था उवासगपडिमा । २३ । अहावरा पंचमा उवासगपडिमा-सबधम्मरुई यावि भवति, तस्स णं बहूइं सीलवय जाव सम्मं अणुपालेत्ता (पडिलेहियाइं) भवति, से णं सामाइय तहेव से णं चाउदसितहेव एगराइयं सम्मं अणुपालेत्ता भवति, से णं असिणाणए वियडभोई मउलियकडे दिया बंभयारी रत्तिं परिमाणकडे, से णं एयारूवेणं विहारेणं विहरमाणे जह० एगाहं वा दुयाहं वा तियाहं वा उक्कोसेणं पंच मासे विहरिजा, पंचमा उवासगपडिमा । २४ । अहावरा छट्ठा उवासगपडिमा-सबधम्मरुई यावि भवति जाव से णं एगराइयं उवासगपडिमं अणुपालित्ता भवति, से णं असिणाणए वियडभोई मउलीयकडे दिया वा राओ वा बंभयारी, सचित्ताहारे य से परिणाए ण भवति, से णं एयारूवेणं विहारेणं विहरमाणे जह० एगाहं वा दुयाहं वा जाव उक्को० छम्मासा विहरिजा, छट्ठा उवासगपडिमा । २५ । अहावरा सत्तमा उवासगपडिमा-सबधम्मरुई यावि भवति जाव राओ वा बंभयारी सचित्ताहारे से परिणाए भवति, आरंभे से अपरिणाए भवति, से णं एयारूवेणं विहारेणं विहरमाणे जह० एगाहं वा दुयाहं वा जाव उक्को० सत्तं मासे विहरिजा, सत्तमा उवासगपडिमा । २६ । अहावरा अट्टमा उवासगपडिमा-सबधम्मरुई यावि भवति जाव राओ वा बंभयारी सचित्ताहारे से परिणाए भवति आरंभे से परिणाए भवति, पेसारंभे य से अपरिणाए भवति, से णं एयारूवेणं विहारेणं विहरमाणे जाव एगाहं वा दुयाहं वा जाव उक्को० अट्ट मासा विहरिजा, से तं अट्टमा उवासगपडिमा । २७ । अहावरा नवमा उवासगपडिमा-सबधम्मरुयी यावि भवति जाव राओ (राओवरायं) बंभयारी सचित्ताहारे से परिणाए भवति आरंभे से परिणाए भवति पेसारंभे से परिणाए भवति, उद्विट्ठभत्ते से अपरिणाए भवति, से णं एयारूवेणं विहारेणं विहरमाणे जह० एगाहं वा दुयाहं वा जाव उक्कोसेणं नव मासा विहरिजा, से तं नवमा उवासगपडिमा । २८ । अहावरा दसमा उवासगपडिमा-सबधम्मरुई यावि भवति जाव उद्विट्ठभत्ते से परिणाए भवति, से णं खुरमुंडए वा छिहलिधारए वा, तस्स णं आभ(इ)ट्टस्स वा समाभट्टस्स वा कप्पंति दुवे भासाओ भासित्तए तं०-जाणं वा जाणं अजाणं वा नो जाणं, से णं एयारूवेणं विहारेणं विहरमाणे जह० एगाहं वा दुयाहं वा उक्को० दस मासा विहरिजा, दसमा उवासगपडिमा । २९ । अहावरा एक्कारसमा उवासगपडिमा-सबधम्मरुई जाव उद्विट्ठभत्ते से परिणाए भवति, से णं खुरमुंडए वा लुत्तसिए वा गहिया-यारभंडगनेवत्थे जारिसे समणाणं निग्गंथाणं धम्मं पं० तं सम्मं काएण फासेमाणे पालेमाणे पुरओ जुगमायाए पेहमाणे दट्टूण तसे पाणे उद्वट्टु पाए रीएजा साहट्टु पाए रीएजा वित्तिरिच्छं वा पायं कट्टु रीएजा, सति परक्कमे संजतामेव परिक्रमेजा, नो उज्जुयं गच्छेजा, केवलं से नायए पेजबंधणे अवोच्छिण्णे भवति, एवं से कप्पति नायविहिं एत्तए, तत्थ से पुट्ठागमणेणं पुट्ठाउत्ते चाउलोदणे पच्छाउत्ते भिल्लिगसूवे कप्पति से चाउलोदणे पडिगाहित्तए नो से कप्पइ भिल्लिगसूवे पडिगाहित्तए, तत्थ णं से पुट्ठागमणेणं पुट्ठाउत्ते भिल्लिगसूवे पच्छाउत्ते चाउलोदणे कप्पति से भिल्लिगसूवे पडिगाहित्तए नो से कप्पति चाउलोदणे पडिगाहित्तए, तत्थ णं से पुट्ठागमणेणं दोवि पुट्ठाउत्ताइं कप्पंति से दोवि पडिगाहित्तए, तत्थ से पुट्ठागमणेणं दोवि पच्छाउत्ताइं नो से कप्पंति दोवि पडिगाहित्तए, तत्थ जे से पुट्ठागमणेणं पुट्ठाउत्ते से कप्पति पडिगाहित्तए, जे से तत्थ पुट्ठागमणेणं पच्छाउत्ते नो से कप्पइ पडिगाहित्तए, तत्थ णं गाहावइकुलं पिंडवायपडियाए अणुपविट्टस्स कप्पइ एवं वइत्तए समणोवासगस्स पडिमापडिवण्णस्स भिक्खं दलयह, एयारूवेणं विहारेणं विहरमाणं केइ पासित्ता वदेजा-के आउसो ! तुमं वत्तबं सिया ?, समणोवासए पडिमं पडिवज्जिते अहमंसीति वत्तबं सिया, से णं एयारूवेणं विहारेणं विहरमाणे जह० एगाहं वा दुयाहं वा तियाहं वा उक्को० एक्कारस मासे विहरेजा, एगरसमा उवासगपडिमा, एताओ खलु ताओ थेरेहिं भगवंतेहिं एगरस उवासगपडिमाओ पण्णत्ताओत्ति बेमि । ३० ॥ श्रमणोपासकप्रतिमाध्ययनं ६ ॥ सुयं मे आउसंतेणं भगवया एवमक्खायं-इह खलु थेरेहिं भगवंतेहिं बारस भिक्खुपडिमाओ पं०, कयराओ खलु ताओ जाव पं० ?, इह खलु एताओ० पं० तं०-मासिया भिक्खुपडिमा दोमासिया भिक्खुपडिमा तिमासिया भिक्खुपडिमा चउमासिया पंचमासिया छम्मासिया सत्तमासिया पढमा सत्तराइंदिया दुच्चा सत्तराइंदिया तच्चा सत्तराइंदिया अहोराइं- (२४६)

दिया एगराइंदिया भिक्खुपडिमा । ३१ । मासियं णं भिक्खुपडिमं पडिवणस्स अणगारस्स निच्चं वोसट्टकाए चियत्तदेहे जे केई उवसग्गा उप्पजंति तं०-दिवा वा माणुसा वा तिरिक्ख-
जोणिया वा ते उप्पण्णे सम्मं सहति खमति तितिक्खति अहियासेति, मासियं णं भिक्खुपडिमं पडिवणस्स अणगारस्स कप्पइ एगा दत्ती भोयणस्स पडिगाहित्तए एगा पाणगस्स,
अण्णाउलं सुद्धोवहडं निज्जुहिता बहुवे दुप्पयचउप्पयसमणमाहणअतिहिकिविणवणिमगा, कप्पइ से एगस्स भुंजमाणस्स पडिगाहित्तए, णो दुण्हं णो तिण्हं णो चउण्हं णो पंचण्हं
णो गुबिणीए णो बालवच्छाए णो दारगं फेज्जमाणीए नो अंतो एलुयस्स दोवि पाए साहट्टु दलमाणीए नो बाहिं एलुयस्स दोवि पाए साहट्टु दलमाणीए, एगं पाए अंतो किच्चा एगं
पायं बाहिं किच्चा एलुयं विक्खंभइत्ता एवं दलयति एवं से कप्पति पडिगाहित्तए, एवं से नो दलयति एवं से नो कप्पइ पडिगाहित्तए, मासियं णं भिक्खुपडिमं पडिवणस्स अणगारस्स
तओ गोयरकाला पं० तं०-आदिमे मज्झिमे चरिमे, आदि चरेज्जा णो मज्झे चरिज्जा णो चरिमे चरिज्जा, मज्झे चरेज्जा नो आइ चरेज्जा नो चरिमे चरेज्जा, चरिमं चरेज्जा नो आदिमं
चरेज्जा नो मज्झे चरेज्जा, मासियं णं भिक्खुपडिमं पडिवणस्स अणगारस्स छविहा गोयरचरिया पं० तं०-पेला अद्धपेला गोमुत्तिया पयंगवीथिका संबुकावट्टा गंतुपच्चागया, मासियं
णं भिक्खुपडिमं पडिवणस्स अणगारस्स जत्थ णं केइ जाणति कप्पइ से तत्थ एगराइयं वसित्तए, जत्थ णं केइ न जाणइ से कप्पति तत्थ एगरायं वा दुरायं वा वसित्तए, नो कप्पइ
एगरायाओ वा दुरायाओ वा परं वत्थए, जं तत्थ एगरायाओ वा दुरायाओ वा परं वसति से संतरा छेदे वा परिहारे वा, मासियं णं भिक्खुपडिमं पडिवणस्स कप्पति चत्तारि भासाओ
भासित्तए तं०-जायणी पुच्छणी अणुणवणी पुट्टस्स वागरणी, मासियं णं भिक्खुपडिमं पडिवणस्स० कप्पति तओ उवस्सगा पडिलेहित्तए तं०-अहे आरामगिहंसि वा अहे वियडगि-
हंसि वा अहे रुक्खमूलगेहंसि वा, मासियं णं भिक्खु० कप्पन्ति तओ उवस्सगा अणुणवित्तए तं०-अहे आरामगिहं अहे वियडगिहं अहे रुक्खमूलगिहं, मासियणं० कप्पइ तओ उवस्सया
उवायणावित्तए तं चेव, मासियं णं० कप्पइ तओ संथारागा पडिलेहित्तए तं०-पुढवीसिलं वा कट्टसिलं वा आहासंथडमेव, मासियं णं भिक्खुपडिमं पडिवणस्स कप्पइ तओ संथारा अणु-
णवेत्तए तं चेव, मासियं णं० कप्पति तओ संथारा ओवायणावित्तए तं चेव, मासियं० इत्थी उवस्सयं उवागच्छिज्जा से इत्थी एवं पुरिसे णो से कप्पइ तं पडुच्च निक्खमित्तए वा पविसि-
त्तए वा, मासियं० जाव पडिवणस्स केइ उवस्सयं अगणिकाएण झामेज्जा नो से कप्पइ तं पडुच्च निक्खमित्तए वा पविसित्तए वा, तत्थ णं केइ वधाय असिं गहाय आगच्छेज्जा जाव
से नो कप्पइ तं पडुच्च अलंबित्तए वा पलंबित्तए वा, कप्पइ से आहारियं रीइत्तए, मासियं णं भिक्खुपडिमं जाव पायंसि थाणू वा कंटए वा हीरए वा सक्करा वा अणुपविसेज्जा नो
कप्पइ से नीहरित्तए वा विसोहित्तए वा कप्पइ से आहारियं रीइत्तए, मासियं णं जाव अच्चिंसि वा० पाणाणि वा बीयाणि वा रए वा परियावज्जिज्जा नो से कप्पइ नीहरित्तए वा विसो-
हित्तए वा, कप्पइ से आहारीयं रीइत्तए, मासियं णं० जत्थेव सूरिए अत्थमेज्ज तत्थेव जलंसि वा थलंसि वा दुग्गंसि वा निण्णंसि वा पव्वयंसि वा विसमंसि वा गड्डाए वा दरीए वा
कप्पइ से तं रयणिं तत्थेव उवायणावित्तए, नो से कप्पइ पदमवि गमित्तए, कप्पइ से कलुं पाउप्पभायाए रयणीए जाव जलंते पाईणाभिमुहस्स वा दाहिणाभिमुहस्स वा पडीणाभि-
मुहस्स वा उत्तराभिमुहस्स वा आहारीयं रीइत्तए, मासियं णं० नो कप्पइ अणंतरहियाए पुढवीए निदाइत्तए वा पयलाइत्तए वा, केवली बूया-आदाणमेयं, से तत्थ निहायमाणे वा
पयलायमाणे वा हत्थेहिं भूमिं परामुसेज्जा अहाविधिमेव ठाणं ठाइत्तए निक्खमित्तए वा, उच्चारपासवणेणं उच्चहिज्जेज्जा नो से कप्पइ ओगिण्हित्तए, कप्पइ से पुव्वपडिलेहित्तए थंडिले
उच्चारपासवणं परिट्टवित्तए, तमेव उवस्सयं आगम्म अहाविधिं ठाणं ठाइत्तए, मासियं० नो कप्पइ ससरक्खेहिं पाएहिं (काएहिं प्र०) गाहावइकुलं भत्ताए वा पाणाए वा नि० पवि०,
अह पुण एवं जाणेज्जा-स सरक्खे सेअत्ताए वा जलत्ताए वा मलत्ताए वा पंकत्ताए वा विद्धत्थे(परिणए)से कप्पइ गाहावइकुलं भत्ताए वा पाणाए वा निक्ख० पवि०, मासियं० नो कप्पइ
सीओदगवियडेण वा उसिणोदगवियडेण वा हत्थाणि वा पायाणि वा दंताणि वा अच्छीणि वा मुहं वा उच्चोलित्तए वा पधोवित्तए वा णणत्थ लेवालेवेण वा, मासियं णं० नो कप्पइ आसस्स
वा हत्थिस्स वा गोणस्स वा महिसस्स वा कोलस्स वा साणस्स वा (कोलसुणगस्स वा) दुट्टस्स वा वग्घस्स वा० आवडमाणस्स पदमवि पच्चोसक्कित्तए, अदुट्टस्स आवडमाणस्स कप्पति
जुगमित्तं पच्चोसक्कित्तए, मासियं णं० नो कप्पइ छायाओ सीयंति उण्हं इत्तए उण्हाओ उण्हंति नो छायां एत्तए, जं जत्थ जया सिया तं तत्थ अहियासए, एवं खलु एसा मासिया
भिक्खुपडिमा अहासुत्तं अहाकप्पं अहामग्गं अहातच्चं सम्मं काएणं फासित्ता पालित्ता सोहित्ता तीरित्ता किट्टित्ता आराहित्ता आणाए अणुपालित्ता भवति । ३२ । दोमासियं णं
भिक्खुपडिमं० निच्चं वोसट्टकाए तं चेव जाव दो दत्ती, तिमासियं० तिण्णि दत्तीओ चाउमासियं० चत्तारि दत्तीओ पंचमासियं पंच दत्तीओ छमासियं छ दत्तीओ सत्तमासियं सत्त
दत्तीओ, जत्थ जत्तिया मासा तत्थ तत्तिया दत्तीओ । ३३ । पढमं सत्तराइंदियं णं भिक्खुपडिमं पडिवणस्स अणगारस्स निच्चं वोसिट्टकाए जाव अहियासेइ, कप्पइ से चउत्थेणं

९८५ दशाश्रुतस्कंधच्छेदसूत्रं, २२१-९

मुनि दीपरत्नसागर

भत्तेण अपाणएणं बहिया गामस्स वा जाव रायहाणीए वा उत्ताणगस्स वा पासेल्लगस्स वा नेसजियस्स वा ठाणं ठाएत्तए, तत्थ दिव्वमाणुसतिरिक्खजोणिया उवसग्गा समुप्पज्जिजा, ते णं उवसग्गा० पयल्लिज्ज वा पवडिज्ज वा नो से कप्पइ पयल्लित्तए वा पवडित्तए वा, तत्थ से उच्चारपासवणे उब्बाधेज्जा नो से कप्पइ उच्चारपासवणं ओगिण्हेत्तए, कप्पइ से पुव्वपडि-लेहियंसि थंडिलंसि उच्चारपासवणं परिट्टवित्तए, अहाविधिमेव ठाणं ठाइत्तए, एसा खलु पढमा सत्तराइंदिया भिक्खुपडिमा अहासुत्तं जाव आणाए अणुपालिता भवति, एवं दोच्चा सत्तराइंदियावि, नवरं दंडातियस्स वा लंगंडसाइस्स वा उक्कडुयस्स वा ठाणं ठाइत्तए, सेसं तं चेव जाव अणुपालिता भवति, एवं तच्चा सत्तराइंदियावि भवति, नवरं गोदुहियाए वा वीरा-सणियस्स वा अंबखुज्जस्स वा ठाणं ठाइत्तए, एवं चेव जाव अणुपालिता भवति। ३४। एवं अहोरातियावि, नवरं छट्टेणं भत्तेणं अपाणएणं बहिया गामस्स वा जाव रायहाणियस्स वा ईसिं दोवि पाए साहट्टु वग्घारियपाणिस्स ठाणं ठाइत्तए, सेसं तं चेव जाव अणुपालिता भवति, एगराइं णं भिक्खुपडिमं पडिवन्नस्स अणगारस्स निच्चं वोसिट्टकाए जाव अहियासेति, कप्पइ से अट्टमेण भत्तेणं अपाणएणं बहिया गामस्स वा जाव रायहाणीए वा ईसिपम्भारगएणं काएणं एगपोगलट्टिताए दिट्ठीए अणिमिसनयणे अहापणिहितेहिं गत्तेहिं सच्चिदिएहिं गुत्ते दोवि पाए साहट्टु वग्घारियपाणिस्स ठाणं ठाइत्तए, तत्थ से दिव्वमाणुसतिरिच्छजोणिया जाव अहाविधिमेव ठाणं ठाइत्तए, एगराइं णं भिक्खुपडिमं अणणुपालेमाणस्स अण-गारस्स इमे तओ ठाणा अहियाए असुभाए अखमाए अणिस्सेसाए अणाणुगामियत्ताए भवंति, तं०-उम्मायं वा लभेज्जा दीहकालियं वा रोगायंकं पाउणेज्जा केवल्लिपन्नत्ताओ धम्माओ वा भंसेज्जा, एगराइयं णं भिक्खुपडिमं सम्मं अणुपालेमाणस्स अणगारस्स इमे तओ ठाणा हियाए जाव आणुगामियत्ताए भवंति, तं०-ओहिणाणे वा से समुप्पजेज्जा मणपज्जवनाणे वा से समुप्पजेज्जा केवल्लनाणे वा से असमुप्पण्णपुव्वे समुप्पजेज्जा, एवं खलु एसा एगराइया भिक्खुपडिमा अहासुत्तं अहाकप्पं अहामग्गं अहातच्चं सम्मं काएण फासिता पालिता सोहिता तीरिता किट्टिता आराहिता आणाए अणुपालिता यावि भवति, एताओ खलु ताओ थेरेहिं भगवंतेहिं बारस भिक्खुपडिमाओ पण्णत्ताओत्ति वेमि । ३५ ॥ भिक्षुप्रतिमाध्ययनं ७ ॥ तेणं कालेणं तेणं समएणं समणे भगवं महावीरे पंचहत्थुत्तरे होत्था तं०-हत्थुत्तराहिं चुए चइत्ता गब्भं वक्कंते, हत्थुत्तराहिं गब्भाओ गब्भं साहरिए, हत्थुत्तराहिं जाए, हत्थुत्तराहिं मुंडे भवित्ता आगाराओ अणगारियं पव्वइए, हत्थुत्तराहिं अणंते अणुत्तरे निव्वाघाए निरावरणे कसिणे पडिपुण्णे केवल्लवरनाणदंसणे समुप्पन्ने, साइणा परिनिव्वुए भयवं, जाव भुज्जो २ उवदंसंइत्ति वेमि । ३६ ॥ पर्युषणाकल्पाध्ययनं ८ ॥ तेणं कालेणं० चंपा नामं नगरी होत्था वण्णओ, पुण्णभदे चेइए, कोणिए राया, धारिणी देवी, सामी समोसढे, परिसा निग्गया, धम्मो कहिओ, परिसा पडिगया, अज्जोत्ति समणे भगवं महावीरे बहवे निग्गंथा य निग्गंथीओ य आमंतेत्ता एवं वदासी-एवं खलु अज्जो! तीसं मोहणीयट्टाणाइं इमाइं इत्थी वा पुरिसो वा अभिक्खणं २ आयरमाणे वा समायरमाणे वा मोहणिज्जत्ताए कम्मं पकरेति, तं०-जे केवि तसे पाणे, वारिमज्जे विगाहिया । उदएणऽकम्म मारेति, महामोहं पकुव्वइ ॥ १८ ॥ सीसावेढेण जे केई, आवेढेइ अभिक्खणं । तिवासुभसमायारे, महामोहं० ॥ १९ ॥ पाणिणा संपिहित्ताणं, सोयमावरि पाणिणं । अंतो नदंतं मारेइ० ॥ २० ॥ जायतेयं समारब्भ, बहु ओरुंभिया जणं । अंतो धूमेण मारेइ० ॥ २१ ॥ सीसंमि जे पहणंति, उत्तमंगंमि चयसा । विभज्ज मत्थयं फाले० ॥ २२ ॥ पुणो २ पणिधीए, हणित्ता (बाले) उवहसे जणं । फलेण अदुवा दंडेणं० ॥ २३ ॥ गूढायारी निगूहिज्जा, मायं मायाए छायाए । असच्चवाई निण्हाइ० ॥ २४ ॥ धंसेइ जो अभूएणं, अकम्मं अत्तकम्मणा । अदुवा तुममकासित्ति० ॥ २५ ॥ जाणमाणो पुरिसओ, सच्च-मोसाइ भासति । अक्खीणझंझे पुरिसे० ॥ २६ ॥ अणायगस्स नयवं, दारं तस्सेव धंसिया । विउलं विक्खोभइत्ताणं, किच्चाणं पडिवाहिरं ॥ २७ ॥ उवगसंतंमि झंपित्ता, पडिलोमाहिं वग्गुहिं । भोगभोगे वियारेति० ॥ २८ ॥ अकुमारभूए जे केइ, कुमारभूएत्तिऽहं वए । इत्थीविसयगेहीए० ॥ २९ ॥ अबंभयारी जे केई, बंभयारीतिऽहं वए । गहभेव गवं मज्जे, विस्सरं नदती नदं ॥ ३० ॥ अप्पणो अहिए बाले, मायामोसं बहुं भसे । इत्थीविसयगिद्धीए० ॥ ३१ ॥ जंनिस्सिए उवहती, जससाऽभिगमेण य । तस्स लुब्भइ वित्तंमि० ॥ ३२ ॥ ईसरेण अदुवा गामेणं, अणीसरे ईसरीकए । तस्स संपरिगहित(यहीण)स्स, सिरी अतुल्लमागया ॥ ३३ ॥ ईसादोसेण आइट्टे, कलुसाउलचेयसे । जे अंतरायं चेएइ० ॥ ३४ ॥ सप्पी जहा अंडपुडं, भत्तारं जो विहिंसइ । सेणावतिं पसत्थारं० ॥ ३५ ॥ जे नायगं च रट्टस्स, नेयारं निगमस्स वा । सेट्ठिं बहुरवं हंता० ॥ ३६ ॥ बहुजणस्स नेतारं, दीवं ताणं च पाणिणं । एयारिसं नरं हंता० ॥ ३७ ॥ उवट्टियं पडिविरयं, संजयं सुसमाहियं । विउक्कम्म धम्माओ भंसेति० ॥ ३८ ॥ तहेवाणंतनाणीणं, जिणाणं वरदंसिणं । तेसिं अवण्णवं बाले० ॥ ३९ ॥ णेयाउयस्स मग्गस्स, दुट्टे अवहर-(रज्ज)ती बहुं । तं तिप्पयंतो भावेति० ॥ ४० ॥ आयरियउवज्झाया, सुयं विणयं च गाहिए । ते चेव खिंसती बाले० ॥ ४१ ॥ आयरियउवज्झायाणं, सम्मं न पडितप्पई । अपरिपूयए थद्धे० ॥ ४२ ॥ अबहुस्सुएवि (य) जे केई, सुएणं पविकत्थई । सज्झायवादं वदति० ॥ ४३ ॥ अतवस्सी य जे केई, तवेणं पविकत्थई । सब्बलोगपरे तेणे० । ४४ ॥ साहारणट्टा जे केई, गिलाणंमि

९८६ दशाश्रुतस्कंधच्छेदसूत्रं, ५२१-९

उवट्टिए । पभू न कुबई किच्चं, मज्झंपि से ण कुवति ॥ ४५ ॥ सढे नियडिपण्णाणे, कलुसाउलचेयसे । अप्पणो य अबोहीए० ॥ ४६ ॥ जे कहाअधिकरणाइं, संपउंजे पुणो पुणो । सव्वति-
 त्याण भेयाए० ॥ ४७ ॥ जे य आहम्मिए जोए, संपउंजे पुणो पुणो । सहाहेउं सहीहेउं० ॥ ४८ ॥ जे य माणुस्सए भोए, अदुवा पारलोइए । तेऽतिप्पयंतो आसयति० ॥ ४९ ॥ इइढी
 जुत्ती जसो वण्णो, देवाणं बलवीरियं । तेसिं अवण्णवं बाले० ॥ ५० ॥ अप्पसमाणो पस्सामि, देवे जक्खे य गुज्झगे । अण्णाणो जिणपूयट्ठी० ॥ ५१ ॥ एते मोहगुणा वुत्ता, कम्मत्ता
 चित्तवद्धणा । जे उ भिक्खू विक्खेज्जा, चरित्त(ज)त्तगवेसए ॥ ५२ ॥ जंपि जाणेइ जो पुवं, किच्चाकिच्चं बहुं जढं । तं वन्ता ताणि सेविज्जा, जेहिं आयाखं सिया ॥ ५३ ॥ आयाखुत्ते
 सुद्धप्पा, धम्मे ठिच्चा अणुत्तरे । तत्तो वमे सए दोसे, विसमासीविसो जहा ॥ ५४ ॥ सुज्झंतदोसे सुद्धप्पा, धम्मट्ठी विदितापरे । इहेव लभते कित्तिं, पेच्चा य सुगतिं वरे ॥ ५५ ॥ एवं
 अभिसमागम्म, सूरा दढपरक्कमा । सव्वमोहविणिम्मक्का, जातिमरणमतिच्छिय ॥ ५६ ॥ त्ति बेभि ॥ मोहनीयस्थानाध्ययनं ९ ॥ तेणं कालेणं० रायगिहे नामं नयरे होत्था वण्णओ, गुण-
 सिलए चेइए, रायगिहे नगरे सेणिए नाम राया होत्था रायवण्णओ, एवं जहा ओवाइए जाव चेइणए सद्धिं० विहरइ । ३७ । तए णं से सेणिए राया अण्णया कयाइं ण्हाए कय-
 बलिकम्मे कयकोउयमंगलपायच्छित्ते सिरसाण्हाते कंठेमालकडे आविद्धमणिसुवण्णे कप्पियहारद्वहारे तिसरयपालंबपलंबमाणकडिसुत्तयसुकयसोहे पिणद्वगेविज्जे अंगुलेज्जग जाव
 कप्परुक्खए चेव अलंकियविभूसिए नरिंदे सकोरंटमल्लदामेणं छत्तेणं धरिज्जमाणेणं जाव ससिद्ध पियदंसणे नरवई जेणेव बाहिरिया उवट्टाणसाला जेणेव सीहासणे तेणेव उवागच्छइ
 ता सीहासणवरंसि पुरच्छाभिमुहे निसीयइ ता कोडुंबियपुरिसे सहावेइ ता एवं वदासी-गच्छह णं तुज्झे देवाणुप्पिया ! जाइं इमाइं रायगिहस्स नगरस्स बहिया तं०-आरामाणि य
 उज्जाणाणि य आसणाणि य आयतणाणि य देवकुलाणि य सभाओ य पवाओ य पणियगिहाणि य पणियसालाओ य छुहाकम्मंताणि य वाणियकम्मंताणि य एवं कट्टकम्मंताणि य
 इंगालकम्मंताणि य वणकम्मंताणि य दब्भकम्मंताणि य जे तत्थेव महत्तरगा आणता चिट्ठंति ते एवं वदह-एवं खलु देवाणुप्पिया ! सेणिए राया भंभासारे आणवेति-जया णं समणे
 भगवं महावीरे आइगरे तित्थगरे जाव संपाविउकामे पुव्वाणुपुव्विं चरमाणे गामाणुगामं दूत्तिज्जमाणे सुहंसुहेणं विहरमाणे संजमेणं तवसा अप्पाणं भावेमाणे इहमागच्छेज्जा तया णं
 देवाणुप्पिया ! तुमे भगवओ महावीरस्स अहापडिरूवं उग्गहं अणुजाणह ता सेणियस्स रण्णो भंभासारस्स एयमट्ठं पियं निवेएह, तए णं ते कोडुंबियपुरिसा सेणिएणं रण्णा भंभासारेण
 एवं वुत्ता समाणा हट्टतुट्टा जाव हियया जाव एवं सामित्ति आणाए विणएणं वयणं पडिसुणंति ता सेणियस्स रण्णो अंतियाओ पडिनिक्खमंति ता रायगिहनगरस्स मज्झंमज्झेणं
 निग्गच्छंति ता जाइं इमाइं भवंति रायगिहस्स बहिया आरामाणि वा जाव जे तत्थ महयरगा आण(अण्ण)ता चिट्ठंति ते एवं वदंति जाव सेणियस्स रण्णो एयमट्ठं पियं निवेदिज्जा भे
 पियं भवतु, दोच्चंपि एवं वदंति ता जामेव दिसं पाउब्भूया तामेव दिसं पडिगया । ३८ । तेणं कालेणं० समणे भगवं महावीरे आदिगरे जाव गामाणुगामं दूइज्जमाणे जाव अप्पाणं
 भावेमाणे विहरति, तते णं रायगिहे नगरे सिंघाडगतिगचउक्कचच्चर जाव परिसा पडिगया जाव पज्जुवासति, तते णं महत्तरगा जेणेव समणे भगवं महावीरे तेणेव उवागच्छंति ता
 समणं भगवं महावीरं वंदंति नमंसंति ता नामगोयं पुच्छंति ता नामगोत्तं पधारंति ता एगयओ मिलंति ता एगंतमवक्कमंति ता एवं वदासी-जस्स णं देवाणुप्पिया ! सेणिए राया दंसणं
 कंखइ जस्स णं देवाणुप्पिया ! सेणिए राया दंसणं पीहेति जस्स णं देवाणुप्पिया ! सेणिए राया दंसणं पत्थेति जस्स णं देवाणुप्पिया ! सेणिए राया दंसणं अभिलसति जस्स णं देवाणु-
 प्पिया ! सेणिए राया नामगोत्तस्सवि सवणयाए हट्टतुट्ट जाव भवति से णं सभ्भे भगवं महावीरे आदिगरे तित्थगरे जाव सव्वणू सव्वदरिसी पुव्वाणुपुव्विं चरमाणे गामाणुगामं दूइज्ज-
 माणे सुहंसुहेणं विहरमाणे इहमागयाते इह संपण्णे इह समोसढे जाव अप्पाणं भावेमाणे विहरति, तं गच्छामो णं देवाणुप्पिया ! सेणियस्स रण्णो एयमट्ठं पियं निवेदेमो पियं भे भव-
 तुत्तिकट्टु एयमट्ठं अण्णमण्णस्स पडिसुणंति ता जेणेव रायगिहे नगरे तेणेव उवागच्छंति ता रायगिहं नगरं मज्झंमज्झेणं जेणेव सेणियस्स रण्णो गिहे जेणेव सेणिए राया तेणेव
 उवागच्छन्ति ता सेणियरायं करतलपरिग्गहियं जाव जएणं विजएणं वद्धावेंति ता एवं वयासी-जस्स णं सामी ! दंसणं कंखंति जाव से णं समणे भगवं महावीरे गुणसिलए चेइए जाव
 विहरइ, तं णं देवाणुप्पियाणं पियं निवेदामो पियं भे भवतु । ३९ । तते णं से सेणिए राया तेसिं पुरिसाणं अंतिए एयमट्ठं सोच्चा निसम्म हट्टतुट्टजावहियए सिंहासणाओ अब्भुट्टेति ता
 जहा कोणिओ जाव वंदति नमंसति ता ते पुरिसे सक्कारेति संमाणेति ता विउलं जीवियारिहं पीतिदाणं दलयति ता पडिविसजेइ ता नगरगुत्तिए सहावेइ ता एवं वदासी-खिप्पामेव
 भो देवाणुप्पिया ! रायगिहं नगरं सव्विभतरबाहिरियं आसियसंमज्जिओवलित्तं जाव पच्चप्पिणंति । ४० । तए णं से सेणिए राया बलवाउयं सहावेति ता एवं वयासी-खिप्पामेव भो देवा-
 णुप्पिया ! हयगयरहजोहकलियं चाउरंगिणिं सेन्नं सन्नाहेह जाव सेऽवि पच्चप्पिणति, तते णं से सेणिए राया जाणसालियं सहावेति ता एवं वदासी-खिप्पामेव भो देवाणुप्पिया ! धम्मियं

९८७ दशाश्रुतस्कंधच्छेदसूत्रं, ६२१-२०

मुनि दीपरत्नसागर

जाणपवरं जुत्तामेव उवट्टावेह ता मम एयमाणत्तियं पच्चप्पिणाहि, तते णं से जाणसालिए सेणिएणं रण्णा एवं वुत्ते समाणे हट्टतुट्टजावहियये जेणेव जाणसाला तेणेव उवागच्छइ ता जाणसालं अणुपविसइ ता जाणं पच्चवेक्खइ ता पच्चोरुभति ता जाणगं संपमज्जइ ता जाणगं णीणेति ता जाणगं संवट्टइ ता दूसे पवीणेति ता जाणाइं समलंकरेइ ता जाणाइं वर-भंडमंडियाइं करेइ ता जेणेव वाहणसाला तेणेव उवागच्छइ ता वाहणसालं अणुपविसति ता वाहणाइं पच्चविक्खति ता वाहणाइं संपमज्जइ ता वाहणाइं अप्फालइ ता वाहणाइं णीणेति ता दूसे पवीणेति ता वाहणाइं अलंकारेति ता वाहणाइं वराभरणमंडियाइं करेति ता जाणगं जोएति ता वट्ठिमोगाहेति ता पओगलट्ठिं पओगधरए य समं आरोहइ ता जेणेव सेणिए राया तेणेव उवागच्छइ ता करयल जाव एवं वदासी-जुत्ते ते सामी ! धम्मिए जाणपवरे, आइट्टा भदंत ! वग्गुगाही । ४१ । तए णं सेणिए राया भंभासारे जाणसालियस्स अंतिए एयमट्टं सोच्चा निसम्म हट्टतुट्ट जाव मज्जणघरं अणुपविसइ जाव कप्परुक्खए चेव अलंकियविभूसिए नरिंदे जाव मज्जणघराओ पडिनिक्खमति ता जेणेव चेल्लणा देवी तेणेव उवागच्छइ ता चिल्लणं देवीं एवं वदासी-एवं खलु देवाणुप्पिए ! समणे भगवं महावीरे आदिगरे तित्थगरे जाव पुट्ठाणुपुट्ठिं चरमाणे जाव संजमेणं तवसा अप्पाणं भावेमाणे विहरति, तं महाफलं खलु देवाणुप्पिए ! तहारूवाणं अरहंताणं जाव तं गच्छामो देवाणुप्पिए ! समणं भगवं महावीरं वंदामो नमंसामो सक्कारेमो संमाणेमो कल्लाणं मंगलं देवयं चेइयं पज्जुवासेमो एतं ण्हं इहभवे य परभवे य हियाए सुहाए खमाए निस्सेसाए आणुगामियत्ताए भविस्सति । ४२ । तते णं सा चिल्लणा देवी सेणियस्स रण्णो अंतिए एयमट्टं सोच्चा निसम्म हट्टतुट्ट जाव पडि-सुणेति ता जेणेव मज्जणघरे तेणेव उवागच्छइ ता ण्हाया कयबलिकम्मा कयकोउयमंगलपायच्छित्ता, किं ते ?, वरपायपत्तनेउरमणिमेहलाहाररइयउबिहियकडगक्खडुएगावलिकंठ-मुरजतिसरयतवरवलयहेमसुत्तयकुंडलुज्जोवियाणणा रयणभूसियंगी चीणंसुयवत्थपवरपरिहिया दुगुल्लसुकुमालकंतरमणिज्जउत्तरिज्जा सव्वोउयसुरभिकुसुमसुंदररइयपलंबसोहंतकंतविक-संतचित्तमाला वरचंदणचच्चिया वराभरणभूसियंगी कालागुरुधुवधुविया सिरीसमाणवेसा बहूहिं खुज्जाहिं चिलातियाहिं जाव महत्तरगाविंदपरिक्खत्ता जेणेव बाहिरिया उवट्टाणसाला जेणेव सेणिए राया तेणेव उवागच्छइ । ४३ । तए णं से सेणिए राया चिल्लणाए देवीए सद्धिं धम्मियं जाणप्पवरं दुरूइति सकोरिंतमल्लदामेणं छत्तेणं धरिज्जमाणेणं उववाइयगमेणं जाव पज्जुवासइ, एवं चेल्लणावि जाव महत्तरगाविंदपरिक्खत्ता जेणेव समणे भगवं महावीरे तेणेव उवागच्छति ता समणं भगवं महावीरं वंदति नमंसति ता सेणियं रायं पुरओ काउं ठितिया चेव पज्जुवासति, तते णं समणे भगवं महावीरे सेणियस्स रण्णो भंभासारस्स चिल्लणाए य देवीए तीसे महतिमहालियाए परिसाए जइपरिसाए इसि० मुणि० देव० मणुस्स० देवी० अणेगसयाए जाव धम्मो कहिओ, परिसा पडिगया, सेणिओ राया पडिगओ । ४४ । तत्थेगतियाणं निग्गंथाण य निग्गंथीण य सेणियं रायं चिल्लणं देवीं पासित्ताणं इमेयारूवे अज्झ-त्थिए जाव संकप्पे समुप्पज्जित्था-अहो णं सेणिए राया महडिडए जाव महासोक्खे जे णं ण्हाए कयबलिकम्मे कयकोउयमंगलपायच्छित्ते सव्वालंकारविभूसिते चिल्लणाए देवीए सद्धिं उरालाइं भोगभोगाइं भुंजमाणे विहरति, न मे दिट्ठे देवे देवलोगंमि, सक्खं खलु अयं देवे, जइ इमस्स तवनियमबंभचेरवासस्स फलंविच्चित्तिसेसे अत्थि तथा वयमवि आगमेस्साए इमाइं उरालाइं एयारूवाइं माणुस्सगाइं भोगभोगाइं भुंजमाणा विहरामो सेतं साहू, अहो णं चिल्लणा देवी महिडिडया जाव महासोक्खा जा णं ण्हाया कयबलिकम्मा जाव सव्वालंकारवि-भूसिया सेणिएणं रत्ता सद्धिं उरालाइं माणुस्सगाइं भोगभोगाइं भुंजमाणी विहरइ, ण मे दिट्ठाओ देवीओ देवलोए, सक्खं खलु इयं देवी, जइ इमस्स सुचरियस्स तवनियमबंभचेरवा-सस्स कल्लाणफलवित्तिसेसे अत्थि वयमवि आगमिस्साणं इमाइं एयारूवाइं उरालाइं जाव विहरामो, सेतं साहुणी । ४५ । अज्जोत्ति समणे भगवं महावीरे बहवे निग्गंथा य निग्गं-थीओ य आमंतित्ता एवं वयासी-सेणियं रायं चिल्लणं देवीं च पासित्ता इमे एयारूवे अज्झत्थिए जाव समुप्पज्जित्था-अहो णं सेणिए राया महिडिडए जाव से तं साहू, अहो णं चिल्लणा देवी महिडिडया सुंदरा जाव से तं साहुणी, से णूणं अज्जो ! अत्थे समट्ठे ?, हंता अत्थि, एवं खलु समणाउसो ! मए धम्मे पण्णत्ते इणमेव निग्गंथे पावयणे सच्चे अणुत्तरे पडिपुण्णे केवलिए संसुद्धे णेआउए सल्लगत्तणे सिद्धिमग्गे मुत्तिमग्गे निज्जाणमग्गे निव्वानमग्गे अवितहमविसंधिं सव्वदुक्खप्पहीणमग्गे इत्थं ठिया जीवा सिज्जंति बुज्जंति मुच्चंति परिनिव्वानंति सव्वदुक्खाणमंतं करेति, जस्स णं धम्मस्स निग्गंथे सिक्खाए उवट्टिए विहरमाणे पुरा दिगिंछाए पुरा पिवासाए पुरा वातातवेहिं पुट्ठेहिं विरूवरूवेहिं परिसहोवसग्गेहिं उदिण्णकामजाए यावि विहरेज्जा, से य परक्कमेज्जा से य परक्कममाणे पासेज्जा जे इमे उग्गपुत्ता महामाउया भोगपुत्ता महामाउया तेसिं णं अण्णतरस्स अतिजायमाणस्स वा निज्जाय-माणस्स वा पुरओ महं दासीदासकिंकरकम्मकरपुरिसपदायपरिक्खत्तं छत्तभिंजारं गहाय निग्गच्छंति तदणंतरं च णं पुरओ महाआसा आसवरा उभओ तेसिं नागा नागवरा पिट्टओ रथा रथवरा रथसंगिल्ली सेच्चं उद्धरियसेयच्छत्ते अब्भुग्गयभिंजारे पगहियतालविंटे पवियण्णसेयचामरवालीयणीए अभिक्खणं २ अतिजाति य निज्जाति य सप्पभा, सपुट्ठावरं च णं ण्हाए कयबलिकम्मे जाव सव्वालंकारविभूसिए महतिमहालियाए कूडागारसालाए महतिमहालयंसि सिंहासणंसि जाव सव्वरातिएणं जोइणा झियायमाणेणं इत्थिगुम्मपरिवुडे (२४७)

महयाहयनदृगीयवाइयतंतीतलतालुडियघणमुयंगमहलपडुप्पवाइयरवेणं उरालाइं माणुस्सगाइं भोगभोगाइं भुंजमाणे विहरइ, तस्स णं एगमवि आणवेमाणस्स जाव चत्तारिपंच अवुत्ता चेव अब्भुट्टेति-भणह देवाणुप्पिया ! किं करेमो ? किं आहरेमो ? किं उवणेमो ? किं आचिट्टामो ? किं भे हियइच्छियं ? किं ते आसगस्स सदति ?, जं पासित्ता निग्गंथे निदाणं करेति जइ इमस्स तवनियमबंभचेरवासस्स जाव साहू, एवं खलु समणाउसो ! निग्गंथे निदाणं किच्चा तस्स ठाणस्स अणालोइयअपडिक्कंते कालमासे कालं किच्चा अण्णतरेसु देवलोगेसु देवत्ताए उववत्तारो भवति महिडिडएसु जाव चिरट्टिइएसु, से णं तत्थ देवे भवति महिडिडए जाव चिरट्टिइए, ततो देवलोगाओ आउक्खएणं० अणंतरं चयं चइत्ता जे इमे उग्गपुत्ता महामाउया भोगपुत्ता महामाउया तेसिं णं अण्णतरंसि कुलंसि पुत्तत्ताए पच्चायाति, से णं तत्थ दारए भवति सुकुमालपाणिपाए जाव सुरूवे, तते णं से दारए उम्मुक्कबालभावे विण्णायपरिणयमित्ते जोव्वणगमणुप्पत्ते सयमेव पेइयं दायं पडिवज्जति, तस्स णं अइजायमाणस्स वा णिजायमाणस्स वा पुरओ महं जाव दासीदास० किं ते आसगस्स सदति ?, तस्स णं तहप्पगारस्स पुरिसजायस्स तहारूवे समणे वा माहणे वा उभयकालं केवलपण्णत्तं धम्मं आइक्खेज्जा ?, हुंता आइक्खेज्जा, से णं पडिसुणेज्जा ?, णो इणट्टे समट्टे, अभविए णं से तस्स धम्मस्स सवणयाए, से य भवति महिच्छे महारंभे महापरिग्गहे अहम्मिए जाव आगमेसाणं दुल्लभबोहिए यावि भवति, तंएवं खलु समणाउसो ! तस्स निदाणस्स इमेयारूवे पावफलविवागे जं णो संचाएति केवलपण्णत्तं धम्मं पडिसुणेत्तए । ४६ । एवं खलु समणाउसो ! मए धम्मे पं० तं०-इणमेव निग्गंथे पावयणे सच्चे जाव सच्चदुक्खाणमंतं करेति जस्स णं धम्मस्स निग्गंथी सिक्खाए उवट्टिया विहरमाणी पुरा दिगिंछाए० उदिण्णकामजाया विहरेज्जा, सा य परक्कमेज्जा, सा य परक्कममाणी पासेज्जा से जा इमा इत्थिया भवति एगा एगजाया एगाभरणपिहाणा तेलपेलाइव सुसंगोविया चेलपेलाइव सुसंपरिग्गहिया रयणकरंडगसमाणा तीसे णं अतिजायमाणीए वा निजायमाणीए वा पुरओ महं दासीदास जाव किं ते आसगस्स सदति ?, जं पासित्ता निग्गंथी निदाणं करेति-जति इमस्स तवनियमबंभचेर जाव भुंजमाणी विहरामि, सेत्तं साहुणी, एवं खलु समणाउसो ! निग्गंथी निदाणं किच्चा तस्स ठाणस्स अणालोइयअपडिक्कंता कालमासे कालं किच्चा अण्णतरेसु देवलोएसु देवत्ताए उववत्तारो भवति महिडिडएसु जाव सा णं तत्थ देवे भवति जाव भुंजमाणे विहरइ, सा णं ताओ देवलोगाओ आउक्खएणं० अणंतरं चयं चइत्ता जे इमे भवंति उग्गपुत्ता महामाउगा भोगपुत्ता महामाउया एतेसिं णं अण्णतरंसि कुलंसि दारियत्ताए पच्चायाति, सा णं तत्थ दारिया भवति सुकुमाल जाव सुरूवा, तते णं तं दारियं अम्मापियरो उम्मुक्कबालभावं विण्णयपरिणयमित्तं जोव्वणगमणुप्पत्तं पडिरूवेणं सुंकेणं पडिरूवस्स भत्तारस्स भारियत्ताए दलंति, सा णं तस्स भारिया भवति एगा एगजाया इट्टा जाव रयणकरंडगसमाणी, तीसे जाव अतिजायमाणीए वा निजायमाणीए वा पुरओ महं दासीदास जाव किं ते आसगस्स सदति ?, तीसे णं तहप्पगाराए इत्थियाए तहारूवे समणे वा माहणे वा उभओकालं केवलपण्णत्तं धम्मं आइक्खेज्जा ?, हुंता आइक्खेज्जा, सा णं भंते ! पडिसुणेज्जा ?, णो इणट्टे समट्टे, अभविया णं सा तस्स धम्मस्स सवणयाए, सा य भवति महेच्छा महारंभा महापरिग्गहा जाव दाहिणगामिए नेरइए आगमिस्साए दुल्लभबोहियत्ताए भवति, एवं खलु समणाउसो ! तस्स निदाणस्स इमेयारूवे पावफलविवागे जं णो संचाएति केवलपण्णत्तं धम्मं पडिसुणित्तए । ४७ । एवं खलु समणाउसो ! मए धम्मे पण्णत्ते इणमेव निग्गंथे पावयणे तह चेव जस्स णं धम्मस्स निग्गंथे सिक्खाए उवट्टिए विहरमाणे पुरादिगिंछाए जाव से य परक्कममाणे पासेज्जा-इमा इत्थिका भवति एगा एगजाया जाव किं ते आसगस्स सदति ?, जं पासित्ता निग्गंथे निदाणं करेति दुक्खं खलु पुमत्तणए, जे इमे उग्गपुत्ता महामाउया भोगपुत्ता महामाउया एतेसिं णं अण्णतरेसु उच्चावएसु महासमरसंगामेसु उच्चावयाइं सत्थाइं उरसि चेव पडिसंवेदंति तं दुक्खं खलु पुमत्तणए, इत्थित्तणं साहु, जति इमस्स तवनियमबंभचेरवासस्स फलवित्तिवसेसे अत्थि वयमवि आगमेस्साणं जाव इमेरूवाइं उरालाइं इत्थीभोगाइं भुञ्जिस्सामो, सेत्तं साहू, एवं खलु समणाउसो ! निग्गंथे निदाणं किच्चा तस्स ठाणस्स अणालोइअपडिक्कंते जाव अपडिवज्जित्ता कालमासे कालं किच्चा अण्णतरेसु जाव से णं तत्थ देवे भवति महिडिडए जाव विहरति, से णं ताओ देवलोगाओ आउक्खएणं जाव अणंतरं चइत्ता अण्णतरंसि कुलंसि दारियत्ताए पच्चायाति जाव ते णं तं दारियं जाव भारियत्ताए दलयंति, सा णं तस्स भारिया भवति एगा एगजाया जाव तहेव सबं भाणियबं, तीसे णं अतिजायमाणी वा जाव किं ते आसगस्स सदति ?, तीसे णं तहप्पगाराए इत्थिकाए तहारूवे समणे वा माहणे वा धम्मं आइक्खेज्जा ?, हुंता आइक्खेज्जा, जाव किं पडिसुणेज्जा ?, णो तिणट्टे समट्टे, अभविया णं सा तस्स धम्मस्स पडिसवणयाए, सा य भवति महिच्छा जाव दाहिणगामिए नेरइए, आगमिस्साणं दुल्लभबोहिए यावि भवति, एवं खलु समणाउसो ! तस्स निदाणस्स इमेयारूवे पावफलविवागे भवति जं णो संचाएति केवलपण्णत्तं धम्मं पडिसुणेत्तए । ४८ । एवं खलु समणाउसो ! मए धम्मे पण्णत्ते इणमेव निग्गंथे जाव अंतं करेति जस्स णं धम्मस्स निग्गंथी सिक्खाए उवट्टिया विहरमाणी पुरादिगिंछाए जाव उदिण्णकामजाया विहरेज्जा, सा य

परकममाणी पासेजा से जे इमे भवन्ति उग्गपुत्ता महामाउया भोगपुत्ता महामाउया जाव किं ते आसगस्स सदति ?, जं पासित्ताणं निग्गंथी नियानं करेति-दुक्खं खलु इत्थित्तणए, दुस्संचाराइं आमंतराइं जाव सन्निवेसंतराइं, से जहानामए अंबपेसियाति वा अंबाडपेसीयाति वा मातुलुंगपेसियाति वा मंसपेसियाति वा उच्छुखंडियाति वा संबलिफालियाति वा बहु जणस्स आसासणिजा पत्थणिजा विं(पी)हणिजा अभिलसणिजा एवामेव इत्थिकावि बहुजणस्स आसासणिजा जाव अभिलसणिजा, तं दुक्खं खलु इत्थित्तणए, पुमत्तणए साहु, जइ इमस्स तवनियम जाव अत्थि अहमवि आगमिस्साणं इमाइं एयारूवाइं पुरिसभोगभोगाइं भुंजिस्सामि, से तं साहुणी, एवं खलु समणाउसो ! निग्गंथी निदानं किच्चा तस्स ठाणस्स अणालोइयअपडिक्कंता जाव अपडिवजित्ता कालमासे कालं किच्चा अण्णतरेसु देवलोएसु देवत्ताए उववत्तारो भवन्ति, से णं तत्थ देवे भवति महिडिडए जाव चइत्ता तहेव दारए भवति जाव किं ते आसगस्स सदति ?, तस्स णं तहप्पगारस्स पुरिसजायस्स जाव अभविए णं से तस्स धम्मस्स सवणयाए, से य भवति महिच्छे जाव दाहिणगामिए नेरइए जाव दुल्लइ-बोहिए यावि भवति, एवं खलु जाव पडिसुणित्तए । ४९ । एवं खलु समणाउसो ! मए धम्मे पण्णत्ते इणमेव निग्गंथे पावयणे जाव तहेव, जस्स णं धम्मस्स निग्गंथे वा निग्गंथी वा सिक्खाए उवट्टिए विहरमाणे पुरादिगिंछाए जाव उदिण्णकामभोगे विहरिजा, से य परकमेजा, से य परिकममाणे माणुसेहिं कामभोगेहिं निव्वेयं गच्छेज्जा, माणुस्सगा खलु कामभोगा अधुवा अणितिया असासया सडणपडणविद्धंसणधम्मा उच्चारपासवणखेलसिंघाणवंतपित्तसुक्कसोणियसमुब्भवा दुरूवउस्सासनिस्सासा दुरूवमुत्तपुरिसपुण्णा वंतासवा पित्तासवा खेला-सवा पच्छा पुरं च णं अवस्सं विप्पजहणिजा, संति उड्डं देवा देवलोए ते णं तत्थ अण्णेसिं देवाणं देवीओ अभिजुंजिय २ परियारेंति अप्पणा चेव अप्पाणं विउच्चित्ता परियारेंति अप्प-णिज्जियाओ देवीओ अभिजुंजिय २ परियारेंति, जति इमस्स तवनियम जाव तं चेव सब्बं भाणियत्तं जाव वयमवि आगमेसाणं इमाइं एयारूवाइं दिव्वाइं भोगभोगाइं भुंजमाणा विह-रामो, सेत्तं साहु, एवं खलु समणाउसो ! निग्गंथे वा निग्गंथी वा निदानं किच्चा तस्स ठाणस्स अणालोइयअपडिक्कंते कालमासे कालं किच्चा अण्णतरेसु देवेसु देवत्ताए उववत्तारो भवन्ति तं०-महिडिडएसु जाव पभासमाणे, से णं देवे अण्णं देवं अण्णं देवीं तं चेव जाव पवियारेंति, से णं ताओ देवलोगाओ आउक्खएणं तं चेव जाव पुमत्ताए पच्चायाति जाव किं ते आसगस्स सदति ?, तस्स णं तहप्पगारस्स पुरिसजायस्स तहारूवे समणे वा माहणे वा जाव पडिसुणेजा ?, हंता पडिसुणेजा, से णं सहहेज्जा पत्तिएज्जा रोइज्जा ?, णो इणट्टे समट्टे, अभविये णं से तस्स धम्मस्स सहहणताए०, से भवति महिच्छे जाव दाहिणगामिए नेरइए आगमेस्साए दुल्लभबोहिए यावि भवति, एवं खलु समणाउसो ! तस्स णियाणस्स इमेयारूवे पावफलविवागे जं णो संचाएति केवलपण्णत्तं धम्मं सहहेत्तए वा पत्तिइत्तए वा रोइत्तए वा । ५० । एवं खलु समणाउसो ! मए धम्मे पण्णत्ते तं चेव से य परकममाणे माणुस्सएसु कामभोगेसु निव्वेयं गच्छेज्जा, माणुस्सगा खलु कामभोगा अधुवा अणितिया तहेव जाव संति उड्डं देवा देवलोगंसि ते णं तत्थ णो अण्णं देवं णो य अण्णाओ देवीओ अभिजुंजिय २ परियारेंति अप्पणा चेव अप्पाणं विउच्चित्ता परियारेंति ता जइ इमस्स तवनियम तं चेव सब्बं जाव से णं सहहेज्जा पत्तिएज्जा रोइज्जा ?, णो इणट्टे समट्टे, अण्णत्थरुईं रुइमायाए से भवति, से जे इमे आरणिया आवसहिया गामणियंतिया किण्हुरहस्सिया णो बहुसंजया णो बहुपडिविरया सब्बपाणभूयजीवसत्तेसु अप्पणा सच्चामोसाइं पउंजंता अहं ण हंतवो अण्णे हंतवो अहं न अज्जावेयवो अण्णे अज्जावेयवो अहं न परियावेयवो अण्णे परियावेयवो अहं न परिघेत्तवो अण्णे परिघेत्तवो अहं न उदवेयवो अण्णे उदवेयवो, एवामेव इत्थिकामेहिं मुच्छिया गढिया गिद्धा अज्जोववण्णा जाव कालमासे कालं किच्चा अण्णतराइं आसुराइं किब्बिसियाइं ठाणाइं उववत्तारो भवन्ति, ततो मुच्चमाणा भुज्जो २ एलमूलयत्ताए पच्चायंति, तं खलु समणाउसो ! तस्स निदानस्स जाव णो संचाएति केवलपण्णत्तं धम्मं सहहित्तए वा० । ५१ । एवं खलु समणाउसो ! मए धम्मे पण्णत्ते जाव माणुस्सगा खलु कामभोगा अधुवा तहेव संति उड्डं देवा देवलोगंसि अण्णं देवं अण्णं च देवीं अभिजुंजिय २ परियारेंति णो अप्पणा चेव अप्पाणं विउच्चिय २ परियारेंति, जति इमस्स तवनियम तं चेव जाव एवं खलु समणाउसो ! निग्गंथो वा निग्गंथी वा निदानं किच्चा अणालोइयअपडिक्कंते जाव विहरति, से णं तत्थ अण्णे देवे अण्णाओ देवीओ अभिजुंजिय २ परियारेंति, णो अप्पणा चेव अप्पाणं विउच्चिय २ परियारेंति, से णं ताओ देवलोगाओ आउक्खएणं तहेव वत्तत्तं णवरं हंता सहहिज्जा पत्तिएज्जा रोइज्जा, से णं सीलवयगुणवयवेरमणपच्चक्खाणपोसहोववासाइं पडिवज्जेज्जा ?, नो इणट्टे समट्टे, से णं दंसणसावए भवति अभिगयजीवाजीवे जाव अट्टिमिंजपेमाणुरागरत्ते जाव एस अट्टे० सेसे अणट्टे, से णं एयारूवेणं विहारेणं विहरमाणे बहूइं वासाइं समणोवासग-परियागं पाउणइ त्ता कालमासे कालं किच्चा अण्णतरेसु देवलोगेसु देवेसु देवत्ताए उववत्तारो भवन्ति, तं एवं खलु समणाउसो ! तस्स निदानस्स इमेयारूवे पावफलविवागे जं णो संचाएइ सीलवयगुणवयवेरमणपच्चक्खाणपोसहोववासाइं पडिवजित्तए । ५२ । एवं खलु समणाउसो ! मए धम्मे पं० तं चेव सब्बं जाव से य परकममाणे देवमाणुस्सएहिं कामभोगेहिं

९९० दशाश्रुतस्कंधच्छेदसूत्रं, १२१-१०

मुनि दीपरत्तसागर

निब्वेदं गच्छेज्जा, माणुस्सगा खलु कामभोगा अधुवा जाव विप्पजहणिज्जा, दिव्वावि खलु कामभोगा अधुवा अणितिया असासया चला चयणधम्मा पुणरागमणिज्जा पच्छा पुवं च णं
 अवस्सविप्पजहणिज्जा, जति इमस्स तवनियम जाव आगमिस्साणं जे इमे भवंति उग्गपुत्ता महामाउया जाव पुमत्ताए पच्चायंति, तत्थ णं समणोवासए भविस्सामि अभिगतजी-
 वाजीवे उवलद्धपुण्णपावे जाव फासुएसणिज्जेणं असणपाणखाइमसाइमेणं पडिलाभेमाणे विहरिस्सामि, से तं साहू, एवं खलु समणाउसो ! निग्गंथो वा निग्गंथी वा निदाणं किच्चा तस्स
 ठाणस्स अणालोइय जाव देवलोएसु देवत्ताए उववत्तारो भवंति, से णं ताओ देवलोगाओ आउक्खएणं जाव आसगस्स सदति ?, तस्स णं तहप्पगारस्स पुरिसजातस्स जाव हंता सह-
 हिज्जा, से णं सीलवयजावपोसहोववासाइं पडिवज्जेज्जा ?, हंता पडिवज्जेज्जा, से णं मुंडे भवित्ता आगाराओ अणगारियं पव्वइज्जा ?, णो इणट्टे समट्टे, से णं समणोवासए भवति अभि-
 गयजीवाजीवे जाव पडिलाभेमाणे विहरति, से णं एयारूवेणं विहारेणं विहरमाणे बहूणि वासाइं समणोवासगपरियागं पाउणइ त्ता आबाधंसि उप्पणंसि वा अणुप्पन्नंसि वा बहूइं
 भत्ताइं पच्चक्खाइ त्ता बहूइं भत्ताइं अणसणाए छेदेति त्ता आलोइयपडिकंते समाहिपत्ते कालमासे कालं किच्चा अण्णयरेसु देवलोएसु देवत्ताए उववत्तारो भवंति, एवं खलु समणाउसो !
 तस्स निदाणस्स इमेयारूवे पावफलविवागे जं णो संचाएति सब्बओ मुंडे भवित्ता अगाराओ अणगारियं पव्वइत्तए । ५३। एवं खलु समणाउसो ! मए धम्मे पण्णत्ते जाव से य परक्कममाणे
 दिव्वमाणुस्सएहिं कामभोगेहिं निब्वेयं गच्छेज्जा, माणुस्सगा खलु कामभोगा अधुवा जाव विप्पजहणिज्जा, दिव्वावि खलु कामभोगा अधुवा जाव पुणरागमणिज्जा, जइ इमस्स तव-
 नियम जाव वयमवि आगमेसाणं जाइं इमाइं कुलाइं भवंति तं०-अंतकुलाणि वा पंतकुलाणि वा तुच्छकुलाणि वा दरिदकुलाणि वा किच्चिणकुलाणि वा भिक्खागकुलाणि वा एएसिं
 णं अण्णतरंसि कुलंसि पुमत्ताए पच्चायंति, एस मे आयापरियाए सुणीहडे भविस्सति, से तं साहू, एवं खलु समणाउसो ! निग्गंथो वा निग्गंथी वा नियाणं किच्चा तस्स ठाणस्स
 अणालोइयअपडिकंते सब्बं तं चेव से णं मुंडे भवित्ता आगाराओ अणगारियं पव्वइज्जा ?, हंता पव्वइज्जा, से णं तेणेव भवग्गहणेणं सिज्झेज्जा जाव सब्बदुक्खाणमंतं करेज्जा ?, णो तिणट्टे
 समट्टे, से णं भवति जेमे अणगारा भगवंतो ईरियासमिया जाव बंभयारिए तेणं विहारेणं विहरमाणा बहूइं वासाइं सामण्णपरियागं पाउणंति त्ता आबाहंसि उप्पणंसि वा जाव भत्ताइं
 पच्चक्खाइंति ?, हंता पच्चक्खाइंति, बहूइं भत्ताइं अणसणाए छेदेति ?, हंता छेदेति,० छेदित्ता आलोइयपडिकंते समाहिपत्ते कालमासे कालं किच्चा अण्णतरेसु देवलोएसु देवत्ताए उव-
 वत्तारो भवंति, एवं समणाउसो ! तस्स नियाणस्स इमे एयारूवे पावफलविवागे जं णो संचाएति तेणेव भवग्गहणेणं सिज्झेज्जा जाव सब्बदुक्खाणं अंतं करेज्जा । ५४। एवं खलु समणा-
 उसो ! मए धम्मे पण्णत्ते इणमेव निग्गंथे पावयणे जाव से परक्कमेज्जा सब्बकामविरत्ते सब्बरागविरत्ते सब्बसंगातीते सब्बसिणेहातिकंते सब्बचारित्तपरिवुडे, तस्स णं भगवंतस्स अणुत्तरेणं
 नाणेणं अणुत्तरेणं दंसणेणं जाव परिनिव्वाणमग्गेणं अप्पाणं भावेमाणस्स अणंते अणुत्तरे निव्वाघाए निरावरणे कसिणे पडिपुण्णे केवलवरनाणदंसणे समुप्पज्जेज्जा, तते णं से भगवं
 अरहा भवति जिणे केवली सब्बणू सब्बदरिसी सदेवमणुआसुराए जाव बहूइं वासाइं केवलपरियागं पाउणति त्ता अप्पणो आउसेसं आभोएति त्ता भत्तं पच्चक्खाइ त्ता बहूइं भत्ताइं
 अणसणाए छेदेइ त्ता तओ पच्छा चरमेहिं ऊसासनिस्सासेहिं सिज्झति जाव सब्बदुक्खाणमंतं करेति, तंएवं समणाउसो ! तस्स अणिदाणस्स इमेयारूवे कल्लाणे फलविवागे जं तेणेव
 भवग्गहणेणं सिज्झति जाव सब्बदुक्खाणमंतं करेति । ५५। तते णं ते बहवे निग्गंथा य निग्गंथीओ य समणस्स भगवओ महावीरस्स अंतिए एयमट्टं सोच्चा निसम्म समणं भगवं महावीरं
 वंदंति नमंसंति त्ता तस्स ठाणस्स आलोएंति पडिकमंति जाव अहारिहं पायच्छित्तं तवोकम्मं पडिवज्जंति । ५६। तेणं कालेणं० समणे भगवं महावीरे रायगिहे नगरे गुणसिलए चेइए बहूणं
 समणाणं बहूणं समणीणं बहूणं सावगाणं बहूणं सावियाणं बहूणं देवाणं बहूणं देवीणं सदेवमणुयासुराए परिसाए मज्झगए एवं आइक्खइ एवं भासइ एवं पण्णवेइ एवं परूवेइ आयाति-
 ठाणनामं अज्झयणं सअट्टं सहेउयं सकारणं ससुत्तं सअत्थं सतदुभयं सवागरणं जाव भुज्जो भुज्जो उवदंसेतित्ति बेमि । ५७॥ आयातिस्थानाध्ययनं ? ०॥ आयारदसाओ दशाश्रुतस्कंधच्छेदसूत्रं